


Lingómbá De Lolenge Na Yango

 Bokono moko ezalaka mingi mingi mpenza te ya mwana moke moko, oyo tosengeli kokanisa ye mpenza na libondeli na ntongo oyo, boye na ntembe te biso nyonso tolingi kosala yango. Minganga bayebi kutu te. Bapési yango nkombo moko boye, kasi nakanisi bamisaleli kaka nkombo moko boye mpo bápesa yango, ba—bayebaki te nini yango ezalaki. Pe, kasi Klisto ayebi nini yango ezali. Nakoki koyebisa bino oyo yango ezali, ezali nde zabolo moko, ya solo, zabolo. Nkombo oyo bakolinga kopesa ye, ee, wana etali bango. Kasi yango nde oyo ye azali, bomoni, molimo mabe. Sikawa tiká ete, biso nyonso elongo, mbala moko elongo sikawa, tóyémba *Ndimá Kaka*, moto nyonso áyémba, sikawa.

Ndimá kaka, ndimá kaka,
Nyonso ekoki kosalema, ndimá kaka;
Ndimá kaka, ndimá kaka,
Nyonso ekoki kosalema, ndimá . . .

² Nkolo akobikisa yo, ndeko mwasi. Tóbondela sikawa mpo na mwana moke yango ya mwasi, wana togumbi mitó.

³ Tata na biso na Likoló, emonani lokola ete nakoki kolongola yango na makanisi na ngai te. Mwana moke yango ya mwasi kuna, azali kobunda na liwa, azali molingami ya moto moko boye. Azali ekelamu na Yo, kasi Satana azali koyiba ye bolengé ya bomoi na ye. Nabondeli éte, na Nkombo ya Klisto, Ótelemisa loboko yango ya kufa, zóngísá moyini yango sima. Yo, Nkolo, Ozali na makoki ya kotelemisa bitutu na ngámbo mibale ya Mbu Motane, pe kopesa bana Yisalaele, libula na Yo, mobembo ya kimia mpo na kokatisa mayi na mbu pe kokota na mboka ya elaka. Nzambe, tobondeli lelo éte Ólongola bipekiseló nyonso pe tiká éte mwana yango ázala na bomoi. Epésámélá biso tósenga. Pe, lokola etóngá ya bato oyo bandimelí Yo, tosengi lobiko ya mwana yango na Nkombo na Yesu. Amen.

⁴ Lelo ezali na motema moko etondi na matóndo nde na—nayeí lisusu epai na bino na Nkombo na Nkolo Yesu. Nazongi ndako mwa moke liboso ya ngonga kolongwa na Louisiana. Namilobelaki ntango mosusu soki nakómi awa liboso na lomingo nakoki koteya na Ecodim. Pe lisusu molunge ezalaki makasi mingi kuna, éte to . . . oyo elingaki kozala mwa malili, ya malamú, ntongo oyo, na ngambo na Louisiana. Bolingaki kofanda na ndako ya boye ata moke te, oyo ezali bobele na ventilateur moko, na Louisiana, elingaki kosenga ézala na climatiseur, soki te bolingaki kokweya evanwí.

⁵ Bongo nayeí bobele mpo na kopema mokolo moko to mibale liboso éte nákende sikawa mbala moko, na Nórdi ya

Saskatchewan, na mpóso ekoya, pe wana eza tééé kino na Prince Albert. Ezali kuna nde banzela esuki na mokili yango, longwá na ngámbo mosusu. Na mokili nyonso yango banzela mosusu ezali te, bobele ba-Indien ná ba-Eskimó nde bazali kuna sima na kati mpenza koleka epai tokokende mbala oyo. Boye tozali na bato ebele oyo bakoya na liyangani yango kouíta na Canada mobimba. Balobi, bamosusu kati na bango, bakoúta mpenza na Ngambo ya Westi, bakoya kuna. Pe ya solo mpenza nazali na mposa ya mabondeli na bino, éte Nzambe ázala elongo na biso pe ápesa biso liyangani monene, ya malamú mingi koleka, mpo na nkembo na Ye. Eleki mibu penepene minei to mitano uta nakendá Canada. Pe nazali na bayike ya baninga ya lokumu solosolo kuna, oyo bazali mpenza bato malamú.

⁶ Pe bazalaka solo sembo mpo na kokende na losambo. Ata malili ezali ndenge nini, bakomizipa na bulangéti pe bakofanda likolo na likálo, mpe bakokumba mpunda yango na ntaka ya ba-kilométre ntuku mitano, mpo bákende na losambo. Bakoleka na bangómbá ya neige na makolo pe na biloko nyonso ya ndenge na ndenge, bilenge ná mibangé. Bango nyonso basanganaka elongo. Pe libota moko ekei kozua oyo mosusu pe babandi kotambola, pe bakei. Ezali—ezali bomipími oyo bamisalaka nde esalaka éte bázua mbano monene kouta na liyangani yango. Na ntango bomipími ezali te, mbano ya mingi ezali te na liyangani yango. Osengeli mpenza komipesa pe kosala eloko moko oyo ekosala mpenza mpasi mingi, osengeli kotiya makambo mosusu pembeni pe kokáta mosala, pe kosala *oyo* to *oyo kuna*, mpo na kokoka kokende na losambo pe kotalisa Nzambe éte olingi Ye, pe omipími mpo na kokende, na ntango wana nde okozua eloko moko uta na yango.

⁷ Ezali mpenza lokola bana na ngai. Billy Paul, nakanisaki éte nako. . . Ngai nazuaki eloko moko te ntango nazalaki mwana moke. Mama azalaki kosómbe ntango mosusu libóké moko ya ba-bombó pe azalaki kokabola yango, mibale to misato na moko na moko. Ntango mosusu mpo na Noel tozalaki kozua mwa keleló ya linzanza to mwa mondóki, to eloko moko boye. Pe nazalaki komona bana mosusu ná makálo, ba-veló pe biloko mosusu, bilamba ya malamú pe ba-kazáka ya malili. Pe na—na, ezalaki kosala ete náyoka mabe mingi, nazalaki koloba: “Soki esali éte naboti bana oyo ya ngai moko, nakosala nyonso oyo nakokoka mpo na bango.” Ee, nakosepela kokufa nzala mpo násómbela bana na ngai eloko moko. Pe ntango nazalaki kofanda. . . Ntango Billy azalaki naino mwana moke, nasombelaki ye mwa veló ya bapiné misato, pe nakosombela ye biloko ya ndenge na ndenge. Pe Meda azalaki komeka kosala nyonso, kozanga ata bilamba na ye moko pe nyonso wana, mpo ásómbela ye eloko moko. Kasi boyebi nini tokomaki komona? Nasombelaki ye mwa veló ya bapiné misato, mwa likulá ná mbanzi, pe biloko ebele. Nakokúta ye ná lú—lútu to nzete moko

kuna na sima ya ndako, azali kotímola libúlú na esika moko boye. Bomoni? Nalobaki: “Baoyo bakolanda bakozala bongo te.” Bomoni? Pesá kaka bato biloko nyonso na maboko na bango, bakolinga yango te. Esengeli ézala eloko oyo omoneli yango mpassi!

⁸ Ezali pe bongo mpo na lobiko. Ezali komipesa mbeka na mobimba nyonso. Ezali bongo, Ndeko Roy. Ezali—ezali mbeka oyo osengeli kopesa mikolo nyonso, eloko moko mpo na—mpo na kopusana pembeni na Nzambe pe kosala eloko moko. Pe nayebi ete ezali libonza mpo na bino nyonso na ntongo oyo, kofanda kati na ndako ya molungé boye. Wana tofandi awa, tókanisa Mbeka oyo eleki monene mpenza, oyo epésámélá na moto ete ásala, yango ezalaki nde Yesu Klisto, ntango Apesamaki mokumba ya koya na mokili mpo na kokufa na esika na biso. Kaka wana te, kasi elimo na Ye ekitaki na ewélo pe ezalaki kuna mikolo misato pe butú misato, pe na mokolo ya misato Ye asekwaki, pe amataki na likoló, afandi na loboko ya mobali ya Nzambe, na Likolo, kolobeláká biso kokokana na litatoli na biso ya likabo na Ye mpo na masumu pe ngolu na Ye oyo epesameli mpo na biso.

⁹ Sikawa kuna na . . . kuna epai tozali kokende, bato bakozala ebele, babólá mpenza, babólá mpenza, ekosenga báteka moko na bangombe na bango, mibale to misato ya bampaté na bango, to eloko moko, mpo bákoka koya na liyangani. Mobange ya Eskimó yango akomema ntango mosusu mwa bamposo ya banyama na ye pe akoteka yango, na ntango oyo ye asengeli na yango mpenza mpo na libota na ye, mpo áyá. Moto na mombongo ya Indien pe ekosengela ásala ndenge moko. Sikawa, biso tokoki ata kobondela mpo na bato yango, boye te? Pe tosengi éte Nzambe ápésa bango eloko moko ya monene.

¹⁰ Sikawa, molungé ezali, nalingi koumisa bino te. Pe nalingi éte na ntongo oyo tótiya makanisi na biso, yambo éte tóbondela mpo na babeli, likoló na *Lingómbá Pe Lolenge Na Yango*. Pe, sikawa, nazali komiyoka éte eleki mwa mikolo, éte Nsango moko mpo na lingómbá epesamelaki ngai na Shreveport, na Louisiana, pe na—nandimi éte yango nde lolenge ya lingómbá. Tokobelema liboso na Nzambe ná likambo yango na ntongo oyo, tokobondela pe tokosenga na Nzambe éte ázunga biso. Nakani koteya yango ndenge moko te, kasi naséngi na Nzambe éte ázunga biso na mokolo oyo tozali kobika kati na yango. Pe liboso . . . Oyo nde Biblia monene ya kala, kasi na kati na yango nde maloba ya Bomoi na Seko ezali.

¹¹ Pe bóbósana te, Liloba ezali Nzambe, Nzambe azali eloko moko te bobele Liloba na Ye. Bisó pe tozali eloko moko te bobele liloba na biso, pe soki tosali . . . Na ntembe te, sikawa, ngai ná bino na ngámbo mosusu . . . na elobeli mosusu, biso tokoki—tokoki koloba: “Oh, nakosala likambo boye,” tolóbi yango mpenza na motema, kasi makambo mosusu ekoki koya oyo ekosala ete tókoka te—tókoka te kosala oyo tolobaki ete tokosala.

Kasi Nzambe akoki kosala yango te, mpo Ye aza na suka te pe Ayebi nyonso, pe nyonso oyo esilá kozala, pe oyo ekozala, to . . . Boye, Akoki koloba likambo moko te, kozanga te Áyeba ete Akoki kokokisa yango.

¹² Pe Abraham, ntango azalaki na mibu mokama, azalaki kobenga biloko oyo ezalaki te, lokola ete ezalaki. Sikawa nazali koloba boye mpo na kopesa mpiko na baoyo tokobondela mpo na bango, babeli. Abraham abengaki biloko oyo ezalaki te, lokola ete ezalaki, na elikya ete Ye Oyo apesaki elaka azalaki na makoki ya kosala, to, ya kokokisa oyo Asilaki kolaka. Sikawa, ntango Nzambe ayebisaki Abraham, ntango azalaki na mibu motoba . . . ntuku sambo na mitano, pe Sarah azalaki na mibu ntuku motoba na mitano, ete bakobota mwana, ee, yango nyonso ekokaki kosalema te. Kasi andimaki yango pe azelaki mwana yango, pe azalaki mpenza komona ete mwana yango azalaki wana, eúmelaki mibu ntuku mibale na mitano liboso ete mwana yango ábótama. Pe Abraham akómaki na mibu mokama ntango mwana yango abotamaki, pe Sarah akómaki na mibu ntuku libwa, mpo andimelaki Ye. Pe abengaki biloko oyo ezali te, lokola ete ezalaki.

¹³ Sikawa, oyo ezali mpo na babeli ná bato na mawa oyo tokobondela mpo na bango. Etali te oyo ba-mpasi na bino ezali, ata soki bozali . . . bokono ya ndenge nini bozali na yango, ata bokomi na mpasi mabe ndenge nini, na ntango boyambi Klisto, Liloba na Ye, na ntango wana bokobenga biloko oyo ezali, lokola ete ezalaki te, soki yango ekesani na Liloba na Nzambe. Sikawa, Nzambe alobaki: “Libondeli ya kondimba ekobikisa mobeli.” Ee, soki Nzambe nde alobaki yango, yango ekati likambo. Boye tótiya makanisi, elikya na biso, pe tósala lokola ete yango esili kosalema. Yango esi esili na ntango toyambi yango.

¹⁴ Ezali pe bongo mpo na lobiko. Tondimi yango, toyambi yango, tondimi yango na motema na biso, toyei liboso na Nzambe pe toyambi Klisto lokola Mobikisi na biso mpenza, pe toyambi Ye. Soki ozali awa na ntongo oyo, pe ozali mosumuki, pe obikisamá te, pe olingi ete óbikisama na nzoto, ozali na bokono, yambo luká Nkolo. Yambá Ye lokola Mobikisi na yo, na sima bokono yango ekosila. Ata soki ezali nini, tiyá bobele likanisi na yo mobimba (ná nyonso oyo ozali na yango) na Mobali oyo amikoká, Klisto Yesu, nyonso oyo etikali ekotambola malamú.

¹⁵ Boye sikawa bóbósana yango te, mpamba te nalobi mwa maloba oyo mpo na baoyo bazali na bokono pe na mawa, na bongo nakoloba, na ntongo oyo, na ntina na lingómbá pe lolenge na yango. Mpamba te namoni ete atako lobiko na nzoto kouta na Nzambe ezali malamú mingi, kasi ntango nazalaki na Shreveport, nasalaki mayangani ya lobiko na nzoto soko misato mpamba ntango nazalaki kuna, misato, to ntango mosusu minei, eleki minei te, kati na mikolo zomi na moko. Koteya milimo ya bato ezali na motuya monene koleka, na esika ya kopesa ntango

molai na lobiko ya nzoto kouta na Nzambe. Atako, bato oyo bazali na bokono pe na mawa, Nzambe akoki kobikisa bango. Pe esílá kotátolama na mokili mobimba, ete Ye abikisaka. Kasi oyo eleki na motuya, sikawa, ezali mpo na elimo oyo ekokufáká te. Nzoto oyo ekokufa. Kasi elimo ekokufáká te, pe tosengeli kobatela yango na alimá pe semba ná Nzambe.

¹⁶ Nalobaka likambo oyo mbala mingi. Nalingi ete nyonso ésalema, mpo ntango nakokóma na ebale na ntongo wana, nalingi mindondo moko te kuna. Nalingi názala na tiké na ngai na loboko, kozeláká nkombo na ngai. Pe nalingi koloba, lokola Polo ya kala, Ndeko Creech: “Nayebi Ye na nguya ya lisekwa na Ye.” Ete ntango Akobenga bato longwá na bakufi, nakobima . . . Nalingi koyeba Ye na nguya ya lisekwa na Ye.

¹⁷ Boye, sikawa, Ye Oyo azali Mokomi ya Buku, tógúmba mitó pe mitema na biso epai na Ye mwa ngonga moke.

¹⁸ Pe, Nzambe, Tata na biso, toyei epai na Yo sasepi, mpo na kosenga ete Ófungolela biso Liloba na Yo. Bisó tokoki kobalola nkasa, kasi bobele Molimo Mosantu nde akoki kofungola Liloba. Boye fungolelá biso Yango na ntongo oyo, Tata, pe pesá biso ngolu na Yo oyo etondá mekémeké. Tozali kotalela Yo. Pe tiká éte Molimo Mosantu ákota kati na Liloba, pe na nzela na bibebú ya moto, ápesa Yango na mitema ya bato, pe tiká ete Ázua Yango pe Átia Yango na motema moko moko kokokana engebene na bosenga na biso. Pe ntango liyangani ekosila, wana tomilengeli mpo na kozonga na bandako na biso, tokogúmba mitó na komikitisa pe tokopesa Yo matóndi pe masanzoli, mpo na nyonso oyo tosili koyekola utá na Yo pe oyo Yo osili kosala mpo na biso. Na Nkombo na Klisto tosengi bongo. Amen.

¹⁹ Litángi ya Liloba, na Santu Yoane, mokapo ya 1, bino baoyo bozali na ba-Biblia pe bokolinga kotángá elongo na ngai to kokoma yango lokola likomi. Pe tokotángá likomi úta na Liloba, na sima tokobondela, ete Molimo Mosantu ábimisa ndimbola mobimba kouta na Liloba mpo na kopésa biso yango. Bisó tokoki kotángá Yango, biso baoyo tozali na makoki ya kotángá, tokoki kotángá Yango, kasi bobele Nzambe nde akoki kopesa ndimbola mobimba. Likomi ekoki kotángama, mpo Yango ezali Liloba na Ye, kasi na sima ndi—ndimbola mobimba esengeli épesamelama nde na Nzambe. Sikawa, na Santu Yoane, mokapo ya 1, boye tóbanda na molongo ya 28 pe tótángá kino na ya 32, ná yango pe.

Makambo yango esalemaki na . . . na ngámbo ya Yordani, epai Yoane azalaki kobatisa.

. . . mokolo oyo elandaki, Yoane amonaki Yesu azali koya epai na ye, pe alobi, Tala Mwana-Mpate ya Nzambe, oyo azali kolongola masumu ya mokili.

Pe ye nde moto nalobaki mpo na ye ete: Sima na ngai moto moko azali koya oyo aleká liboso na ngai, mpo azalaki liboso na ngai.

Ngai nayebaki ye te, kasi ye . . . kasi mpo ye ákoka . . . kotalisama na Yisalaele, nde ngai nayaki kobatisa na mai.

. . . Yoane atatoli ete: Namonaki Molimo ezali kokita lokola ebenga longwa na likolo, pe efandaki likolo na ye.

Nalingi kotánga yango lisusu, molongo wana ya suka, molongo ya 32.

Pe Yoane atatoli ete: Namonaki Molimo ezali kokita lokola ebenga longwa na likolo, pe efandaki likolo na ye.

²⁰ Sikawa tiká éte Nkolo ábakisa mapamboli na Ye na Liloba. Nalingi éte bómeke ko—kososola liloba moko na moko soki tokokoka. Bozali koyoka ngai malamumu kuna na sima? Malamumu, bozali koyoka ngai na sima kuna? Soki bozali koyoka, tombola loboko. Eza malamumu.

²¹ Sikawa, nalingi kosolola na bino na ntongo oyo na—na lisele, na lolenge moko boye éte ata mo—moto oyo mpenza alingaka losambo te oyo azali awa, ákoka kososola. Sikawa, toyaka na losambo mpo tókóma malamumu koleka. Toyáka mpo tókóma bato malamumu koleka, Baklisto malamumu koleka, baimboka ya malamumu koleka, batata malamumu koleka, bamama malamumu koleka, bazalani malamumu koleka. Toyáka mpo Klisto alobaki na biso ete soki tokoya, pe tokosenga eloko nyonso na Nkombo na Ye, epai tosangani ata bato mibale to misato, Akozala elongo na biso pe Akopesa biso yango. Boye, eloko nini ekoki koleka, kozala malamumu mpo na biso lelo, koleka koyeba éte tozali na losambo mpo tómikomisa malamumu koleka, kokomisa lisosoli na biso monene? Bato boni bakoloba: “Yango nde ntina nazali awa”? Tótála naino. “Na—nalingi lisosoli moko ya malamumu koleka.” Pe tokoki—tokoki kozua lisosoli ya malamumu koleka te bobele soki e . . . Pe soki tokozua lisosoli ya Nzambe, yango esengeli éúta na Liloba na Nzambe, mpamba te Liloba ezali eloko oyo Nzambe apésá biso mpo na koleisa milimo na biso ya nzala. Pe Molimo Mosantu atindámá mpo ázua Liloba na Nzambe pe áleisa biso na nzela na Liloba. Bomoni yango? Bomoni, biso . . . Molimo Mosantu atindámi na Nzambe, mpo ázua Liloba na Nzambe pe ápesa biso Yango kokokana na bosenga na biso. Sikawa, nasepeli mingi ndenge Nzambe abongísá makambo ya ndenge wana. Boye te? Ete Akoleisa biso.

²² Bisó tozali bampate ya elanga na Ye. Tokolobela yango sima na mwa ngonga moke, bampate. Pe tozali ekelamo ya Nzambe oyo azali na biteni misato, pe na ntango Ye akonzí biso na mobimba, Akoki kotámbwisa biso pe kokamba biso.

²³ Sikawa, esepelisaki Nzambe mingi, na lolenge ete ntango Atindaki Yesu na mokili, esepelisaki Ye ete Átalisa Ye lokola ebwélé, pe ebwélé yango ezalaki mwana-mpate. Kuna mpenza

na ebandeli, na Elanga ya Edene, na etaliseli bililingi ya boyei na Yesu, Nzambe akabaki mbeka, to azuaki mwana-mpate mpo ézwa esika lokola mbeka ya etaliseli bililingi ya liboso ya boyei na Klisto. Sikawa, namitunaka mbala mingi mpo na nini Nzambe asepelaki kotalisa liboso Klisto lokola ebwélé, lokola nyama. Kasi toyei komona éte mwana-mpate, ntina oyo Aponaki mwana-mpate, mwana-mpate ezali na kosókema mpenza pe na bopolo mpenza, koleka bikelamo nyonso oyo ezali na mokili. Eloko moko te ezali na bolengi pe na bopolo koleka mwana-mpate, eyebi na yango mabe te, emikokélá na yango moko te. E—ezali na lofundu te. Ezali mwa ekelamu ya kosókema, ya bopolo. Pe ntango Nzambe alingaki kotalisa Klisto na mokili, Atalisaki Ye na mwana-mpate.

²⁴ Sikawa, kasi ntango Nzambe, Tata Nzambe, Yawe, alingaki komitalisa longwa na Likoló, Atalisamaki na ndeke oyo ezali mpenza na kosókema koleka, na komikitisa koleka bandeke nyonso oyo epumbwaka na likoló, elingi koloba, ebengá. Ndeke moko te ezali na bopolo koleka ebengá. Nayekolaki mpenza bomoi ya bandeke pe banyama ya zamba, pe ebengá ezali ndeke ya ndenge mosusu mpenza oyo ekeseni na bandeke mosusu nyonso oyo epumbwaka na likoló. Ebengá eyebi ko—ko—kolinga. Ebengá ezali na bopolo. Pe ebengá ezali na mbuma ya bololo te, ezali kaka ye nde azangi mbuma ya bololo na libota ya bandeke. Yango nde ntina oyo bokomona ata mokolo moko te ebengá epai moko te bobele nzinga-nzinga ya bisika oyo mbuma pe mombótó ezali. Sikawa, ma . . .

²⁵ Na kati ya masuwa, ebengá ezalaki. Pe ebengá etalisami na bisika mingi na Biblia. Ezali elembo ya Molimo Mosantu. Pe lisusu mwana-mpate etalisami na bisika mingi na Biblia, lokola Klisto, na Emoniseli, kozonga tééé kino na Genese, ezali pe ndenge moko ná ebengá.

²⁶ Pe na Buku ya Genese, ebengá ezalaki na kati ya masuwa, efandaki na étápe elongo ná—elongo ná bandeke mosusu ya likoló; pe moko na bango ezalaki kómbékómbé, eyángánga. Pe eyángánga ezali moko na bandeke ya nkanza koleka, eyángánga ná Jaybird, nabanzi, ezali tóloba bandeke ya nkanza koleka oyo tokoki komona. Eyángánga ezali ndeke oyo ebikaka ntango molai mpenza, pe ebikaka (ndenge balobaka) mibu, mbala mosusu, nkama mibale to misato, wana eyángánga . . . Tshakú ebikaka ntango molai koleka wana.

²⁷ Kasi ebengá ezali nyama moko to ndeke moko oyo azali na mbuma ya bololo te. Sikawa, eyángánga akoki kofanda awa pe kolia ebembe ya nyama. Bokotikáláká komona ebengá pembeni na ebembe yango ata mokolo moko te. Akokoka koyíkela yango mpíko te. Nsolo na yango na zólo na ye, akokoka koyíkela yango mpíko te. Ekopesa ye mposa ya kosánza. Bakokaka ata moke te kozala pembeni na eloko oyo ezali kobeba, kopola. Bakokaka koyíkela yango mpíko te, na bongo akokoka kolia yango te. Soki

ameki kolia yango, ekoboma ebengá na mbala moko, mpo eloko oyo eníkaka bilei, ezali nde na mbuma ya bololo na ntango esopani kati na estomá, mpo ete bilei égumboana. Kasi soki mbuma ya bololo ezali te, mpo ékota kuna mpo na kosala yango, boye ekoboma ebengá. Na bongo bokomona ntango nyonso ebengá nzinga-nzinga na esika elóko moko ezali peto, elóko moko oyo ezali malamú.

²⁸ Sika, eyángánga azali ndenge mosusu. Na yango, bótala bobele ndenge eyángánga azali etáliseli ya moto na bilongi mibale. Eyángánga akoki kokita likoló na—likoló na ebembe ya nyama pe alei ndenge mpenza ye alingi, pe kopumbwa mbala moko kino na elanga bongo kolia blé, pe lokola. Kasi ebengá akoki kolia blé te pe sima kopumbwa likoló na ebembe ya nyama.

²⁹ Boye, moto na bilongi mibale, moto akoki kozala moto na bilongi mibale bongo kolia biloko ya molimo, pe biloko ya malamú ná biloko ya mabe. Kasi Moklisto ya solosolo oyo abótámá mbala ya mibale akoki koyíkela makambo ya mabe mpíko te, pe akoki kolia bobele biloko ya malamú. Bótala yango malamú! Soki bomoni moto oyo akoki kokende na mabína, kokende komela masanga, kokende kobika na masumu, kozonga na losambo pe ntango mosusu kogánga lokola mosantu moko mpenza, yango ezali nini? Azali molei nyama ya kopola, akoki kolia biloko epolá pe biloko ya malamú. Kasi Moklisto ya solosolo akoki lisusu koyíkela makambo wana mpíko te, mpo asílá koleka longwa na kúfa kino na Bomoi. Pe na mbala moko yango ekokweisa ye mpenza, kaka na kokanisáká likambo yango, kino ete ekokweisa ye, kino ete akopesa yango mokongo pe akokende mosika na yango. Oh, oyo elílingí moko kitoko!

³⁰ Boye, mwana-mpate azali mwa nyama moko ya bopolo mpenza. Akokaka te, akoki komisunga te. Atalelaka makoki na ye moko te, mpo akoki komisunga te. Eleki mwa ntango awa, nazalaki koleka na elanga moko ntango nazalaki kosala patrouille, pe namonaki mwa mwana-mpate moko, pe bamosusu nyonso basundolaki ye, na lolenge moko boye, pe akangamaki ye mobimba kati na ba mwa nsinga ya kangá-moyíbi. Pe mwa eloko yango alalaki wana, kotangáká makila pe koleláká. Napusanaki pe namonaki na mosika, pene na ntaka ya métre nkama mwambe, etóngá moko mobimba ya bampate ezali kuna. Sikawa, akokaki kotikala bobele wana, pe biyángánga balingaki kotúba-tuba ye na miso kala mingi te, soki tolongolaki ye te. Kasi nakangolaki mwa ebwélé yango, namemaki ye na maboko na ngai. Aboyaki ata moke te. Afandaki mpenza kimia. Namemaki ye na maboko na ngai. Ntango mosusu, mbala ya liboso—ya liboso, éte moto ásímba ye, kasi azalaki na bopolo. Andimaki ete ákambama. Andimaki ete ásungama. Nákolikya ‘te bókomona yango. Azalaki na mposa ya komeka te koboya to kobunda-bunda, to koswa míno. Bana-mpate babunda-bundaka

te, baswaka míno te; bamikitisaka kaka. Pe mwa ebwélé oyo, namemaki ye pe nakitisaki ye na esika bampate mosusu bazalaki. Sima na miníti moke mama na ye amonaki ye, ndenge azalaki mpenza na esengo! Sikawa, ndenge yango ezali mpenza etaliseli ya Mwana-mpate ya Nzambe!

³¹ Boyebi, esika oyo bakendeke koboma bampate, boyebi oyo akambaka bampate kino na esika ya kosélumuka na abattoire, ezali nde ntaba mobali. Ntaba mobali akokamba bampate kino na esika ya kobomama, pe, bongo kaka na ntango akómisi bampate na esika ya kosélumuka, bongo ye akopumbwa libanda. Kasi, oh, balobaka, soki balingi koboma ntaba mobali, na ntango wana nde abunda-bundaka na makasi nionso. Bomoni?

³² Pe ezali ndenge wana nde zabolo asalaka. Akoluka kokamba bana ya Nzambe na kati ya makambo ya mabe koleka, kasi soki ekómi ngala na ye ya kokufa, na ntango wana akobunda-bunda makasi mpenza. Ndenge wana nde zabolo asalaka. Pe ndenge wana nde mbala na mbala, elenge mwasi moko ya kitoko to elenge mobali moko ya mayele mabe, ná paké ya makaya to molangi ya wiskí, akopéngwisa elenge mwasi, mwana-mpate ya etonga ya moto moko boye, amemi ye na nzela ya mabe. “Oh, ezali nango mabe te. Eloko moko ya malonga ezali te na makambo nyonso oyo etali losambo.” Kasi tiká liwa ébeta mwana mobali yango mbala moko kaka, bokoyoka ndenge akogánga, akobelega na mboka mobimba. Pe wana nde ndenge zabolo asalaka yango.

³³ Kasi mwana-mpate azali na bopolo mpenza, na lolenge éte akoki kokambama. Yango nde ntina oyo Nzambe atalisaki Klisto lokola Mwana-mpate, pe Ye moko lokola Ebengá. Pe mokolo oyo Yoane abatisaki Yesu na ebale ya Yordani, moko na makambo ya minene oyo esalémá, esalemaki mpenza wana. Bótala ndenge eza kitoko! Mwana-mpate, ya bopolo koleka na bikelamu nyonso ya mokili, ná Ebengá, ya bopolo koleka bandeke nyonso oyo bapumbwaka na Likoló. Sikawa, yango nde lolenge bobele moko oyo bakokaki kosangana. Ezali lolenge bobele moko oyo Ebengá akokaki kokita likoló na Mwana-mpate. Sikawa, ntango Ebengá yango akitaki, Yoane amonaki Yesu, pe alobaki: “Tala Mwana-mpate ya Nzambe, oyo azali kolongola masumu ya mokili.” Pe Yoane alobaki: “Natatoli, namoni Molimo ya Nzambe lokola Ebengá kokita, pe kofanda likolo na Ye.” Aleluya! Yango wana mpenza. Ebengá ná Mwana-mpate basanganaki. Na ntango wana nde Nzambe ná Moto bakómaki moko. Wana nde ntango Likoló ná nse eyambanaki. Aleluya! Wana nde ntango Nzambe akómaki nzoto, esalemaki, wana nde ntango Nzambe akitaki longwá na lolenge ya Molimo pe Akómaki Moto pe Afandaki elongo na biso. Wana nde ntango Seko-na-seko mobimba eyambanaki. Wana nde ntango libota ya bato ya Adama oyo ekweyaki, ná Nzambe Yawe, ná banje nyonso

basanganaki, ntango Nzambe ná moto bakómaki moko, na mokolo monene wana ya likundoli ntango Yoane abatisaki Yesu.

Sikawa, bongo soki ezalaki mbwa ya zamba? Loyembo ya bopolo ya Ebengá elingaki kokoka kozala pembeni na mbwa ya zamba ata moke te.

³⁴ Eloko nini yango ezali malamú koleka, na mpokwa moko mpenza, koyoka mibange na bibengá oyo bafandi kuna libanda pe bákoyemba mwa moke? Sima na ngai kokufela mwasi na ngai ná bebé. . . Nazalaki kolinga te éte moto moko áyeba nini nazalaki kosala. Nazalaki kokota na motuka na ngai ya kala, nakokumba na nzela awa, kokende awa na malíta ya Walnut Ridge, nakofanda kuna na ngambo na nzete moko pe nakotala nkunda yango. Nazalaki kokoka kotika bango te. Ekomaki lokola éte nakokaki lisusu koyíkela yango mpiko te. Nakokanisa, bebé na ngai ya sanza mwambe, alali kuna. Ndenge azalaki kosémbola mwa maboko na ye mpo na kosimba ngai, pe ngai nakobeta síflé to koloba na ye likambo, pe ye akosala “guu-guu”, kosembola mwa maboko na ye. Bongo nakofanda pene na nzete moko, mingimingi na ntango mpokwa ekomi. Pe mobange na ebengá moko azalaki kofanda wana na mwa zamba, pe akobanda koyemba. Oh! la la! Mbala moko namitunaki soki ezali elimo oyo ekowáká te ya bebé na ngai nde ezalaki kozonga mpo na koluka kosolola na ngai. Eloko moko te eleki kolela wana oyo ya ebengá yango na kitoko. Azali mpenza na bolingo! Amemaka bansango. Ndenge alukaka mpenza kotia kimia! Nalamukaka na ntongo-ntongo, nakendeke na mwa zamba oyo ezali pembeni na esika nafandaka, koyoka yango eza mpenza eloko moko epesaka kimia! Bibengá yango bafandaka likolo na banzete minene milai wana, bákoyembáká bamoko na bamosusu.

³⁵ Mokolo mosusu wana, epai ya Ndeko Cox, mama ebengá moko azalaki na bana mibale. Bafandaki mpenza likoló na ndako, mpo baniáu bákoka kokanga bango te. Pe mama ebengá azalaki koleisa bango. Na sima akokita, kozua bango pe kosala ete bámata na nzete, pe bakofanda wana ná bakíngó na bango ezingani moko epai na mosusu, koyemba pe kotalisana bolingo, mokolo mobimba, mwa ba-bebe bibengá mibale ya bopolo.

³⁶ Pe nakanisaki ndenge nini Nzambe, (ebengá ezali ndeke moko ya bolingo mpenza) pe Ebengá, Nzambe, alingáki kobika bolingo ná bikelamu na Ye bato. Nzambe alingi álingama. Nzambe alingi álinga yo. “Nzambe alingaki mokili mingi, Apesaki Mwana-na-likinda na Ye, éte moto nyonso oyo akondimela Ye ákúfa te, kasi ázala na Bomoi na seko.” Nkolo ápambolama! Boye Nzambe, na kolingáká kobika bolingo, Asengelaki na e. . . kosala eloko moko oyo ekoki kolingama. Asengelaki kosala eloko moko ya bopolo lokola Ye moko. Asengelaki kosala eloko moko oyo ekokaki kolingama. Asengelaki kosala eloko moko oyo ezali na Lolenge na Ye Moko.

37 Okoki kolinga te eloko oyo ezali na lolenge na yo moko te. Kolinga esengeli kosangana ná bolingo. Mobali ná mwasi na ye basengeli kolingana, soki balingi mpenza kokende liboso. Libota esengeli bálingana moko na mosusu, soki balingi mpenza kokende liboso. Eloko moko oyo ekolingama! Okoluka bipai nionso, kokutana na elenge mwasi oyo olingi mpo ákóma mwasi na yo. Mwasi akoluka, kokutana na mobali oyo ye akoki kolinga.

38 Nzambe ákoluka, komeka kokutana na elimo oyo Akoki kolinga. Boye, Amitalisaki Ye moko awa na mokili lokola Ebengá ya bopolo pe Mwana-mpate ya bopolo. Soki Mwana-mpate yango, ata na ngonga moke, azuaki lolenge ya mbwa mabe ya zamba, Ebengá wana alingaki kopimbwa na Ye na mbala moko, alingaki kokima mosika.

39 Kasi mwa—mwa—mwana-mpate, azalaka na mayele moko ya koleka na miso na ye moko te. Mwana-mpate azali eloko moko, soki abungi, abungi mpenza kobunga. Mpate akoki koyeba nzela ya kozóngá te. Yango nde ntina ntaba amemaka ye na kufa na ye. Mpate oyo abungi, akoki lisusu koyeba nzela te. Yango nde ntina oyo Nzambe akokanisaki biso na mpate. Na ntango tobungi, tobungi mpenza. Makoki ya komimonisama ezali te. Pe ezali bobele na lolenge moko ya kosala yango, ezali ete, komikaba biso moko na Mobateli-mpate ya etóngá, mpo Ye ákamba.

40 Sikawa, ndenge namoni Mwana-mpate oyo ná mpate elongo. . .Mwana-mpate ná Ebengá, nde, elongo, bakómaki moko. Bongo bótala ndenge Ebengá akambaki Mwana-mpate, Mwana na Nzambe. Ndenge Azalaki na bopolo, koyeba ete Azalaki kokende kobomama. Ye azalaki na bopolo mpenza, komeka komisalisa Ye moko te, komeka komikokela na ye moko te. Alobaki: “Nasalaka eloko moko te soki Tata atalisi Ngai liboso te, pe Tata afandi kati na Ngai.”

41 Sikawa, eloko mosusu oyo mwana-mpate azali, mwana-mpate andimaka kotika makoki na ye. Sika, Nzambe alingi éte tózala bana-mpate, kasi mbala mingi tolingaka kotika makoki na biso te, kosundola makoki na biso. Mingi kati na bino bolobaka: “Ee, nazali na makoki, Ndeko Branham.” Ezali ya solo, kasi ondimi kosundola makoki na yo? Ondimi kotika makoki na yo, mpo Nzambe ákoka kokamba yo? Yango nde likambo ya mangómbá na biso lelo, mingi kati na bango, na oyo etali bopolo ya Mwana-mpate ya Nzambe. . . Tosengeli kozala bana-mpate, tokómá nde biloko nyonso mosusu kasi bana-mpate te. Pe wana nde ntina, kaka na ntango tozui lolenge wana, Ebengá ya Molimo Mosantu apumbwaka na Ye pe akeyi.

42 Soki Mwana-mpate ya Nzambe ágángaka lokola mbwa ya zamba, to soki ásálaka likambo moko kokesana na oyo Ebengá ya bopolo apeselaki yango ndingisa, Ebengá alingaki kopumbwa na Ye. Alingaki kokende na mbala moko.

43 Pe yango nde ntina oyo lelo tokómi komituna: “Likambo nini ekómeli lingomba ya ba-Pantekotiste?” Ezali mpo tozui lolenge mosusu. Tozui lolenge ya koloba: “Tolingi makoki na biso. Tokosala oyo toyebi ete ezali malamumu mpo na kosala.” Pe tokómi lofundu. Tokómi mindondo. Tozali kokipé lisusu te. Totiki nkanda ékota. Totiki moyimi ékota.

44 Mwana-mpate, na ntango ekómi ngonga. . . Nkunza na ye ezali ya ye moko, wana ezali makoki na ye. Nkunza na ye ezali ya ye, kasi bakozwa mwana-mpate pe bakobwaka ye likolo na mesa, pe bakokanga ye singa na makolo. Abunda-bundaka soko moke te, asalaka eloko moko ata moke te. Obotoli ye kaka makoki na ye na mbala moko, mpo azali mwana-mpate. Akoki kosala eloko moko mosusu te, mpo wana nde lolenge na ye. Kasi meká ngonga moko kotúmola Moklisto, okoyeba soki azali mwana-mpate to ntaba. Okoyeba soki ye azali nani, meká naino kotúmola ye. Yango nde ntina lelo mangómbá na biso ekómi ndenge ekómi.

45 Tomibéngaka bana-mpate ya Nzambe. Basi ná mibali, elongo, bakómi kosala makambo ya ndenge nyonso kasi lokola bana-mpate ya Nzambe te. Bótála bango ndenge bákotamboláká na balabala, ná kupe, suki bakátá, ba-kerli suki nyonso. Eleki mwa mibu, bozalaki kobenga. . . bino, bango. . . ata soki bofuti bango, balingaki kosala yango te. Bongo bókomituna mpo na nini lingómbá ekómí na lolenge oyo ezali na yango. Ezali mpo bozui lolenge ya mbwa ya zamba to ya ntaba mobali, na esika ya kobatela bopolo ya komikitisa. Pe okoloba: “Ezali litomba na ngai, Ndeko Branham.” Nayebi ete ezali litomba na yo. “Bakáti suki bakátaka suki. Na ntango nyonso oyo mokáti suki azali kokata suki, ngai nazali na makoki te?” Ezali ya solo, wana ezali litomba na yo bato ya Amerika. Kasi okondima kotika yango, mpo na kozala mwana-mpate? Okondima komitika yo moko?

46 Pe bino basi, kala mingi te, bozalaki kotambola na balabala. . . Ezali nsoni komona ndenge basi bákolata lelo. Pe nazali kolobela ba-Presbiterien ná ba-Methodiste te, nazali nde kolobela bino basi ya la sainteté. Kotambola na balabala, pe ezali. . .

47 Natiá ekulusu moko ya moke na liboso ya motuka na ngai, pe moto moko alobaki na ngai, alobaki: “Billy, oyebi ete ezali elembo ya ba-Katoliko?”

48 Nalobaki: “Na ntango nini ekulusu ekómáki eloko ya ba-Katoliko?” Mokolo moko te! Ezali elembo ya kondima ya ba-Katoliko te; ezali nde elembo ya kondima ya Baklisto. Kondima ya ba-Katoliko ezali mosantu moko akúfá, Mariya to—to moto moko boye akúfá oyo bango basambelaka. Bisu tosambelaka bato bakúfá te. Tosambelaka Santu Cecile ná basantu nyonso wana te. Wana nde bo-Katoliko, oyo ezali kisolóka ya likoló

mpenza koleka. Kasi ekulusu ezali elíngí ya Ye Oyo akufaki pe asekwaki.

⁴⁹ Pe nalobaki: “Natiá yango wana, ntango natalaka na ba-balabala. Eleki mibu ntuku mibale na mitano, to ntuku misato, ntango nakómaki pene nákúfa miso, nalakaki Nzambe ete soki Abikisi miso na ngai nakobanda kotala biloko ya malamú.” Pe nalobaki: “Bipai nyonso okobwaka miso, ekomi mpenza bosoto, basi pene bolumbu, pe basi bolumbu balali na pelúze ya mapango pe bipai nyonso. Natalaka ekulusu na esika ya kotala yango (pe nakokanisa oyo Klisto asalá mpo na ngai, bongo nalongoli miso na ngai) na eloko oyo ezali ya zabolo.” Aeluya!

⁵⁰ Pe bato yango bazali. . . Bóloba te éte ezali “ba-Presbiterien, ba-Katoliko,” ezali ba-Pantekotiste! Amen. Okoloba: “Nazali na makoki yango, Ndeko Branham.” Ezali ya solo, kasi soki ozalaki mwana-mpate, olingaki kosundola makoki na yo. Pe na ntango obandi kosala bongo, Molimo Mosantu, Ebengá ya bopolo, apumbwe na Ye na mbala moko. Akoyokisama nsoni elongo na yo te. Te, te, te. Kokanisa soko moke te éte soki osali bongo okokóba kozala na Molimo Mosantu. Okokoka kosala yango te! Biblia nde elobi bongo. Osengeli kosundola ma. . . Ee, okoloba: “Basi mosusu nyonso basalaka yango.”

⁵¹ Ná bino mibali, bino mwa biloko oyo ezángá mikuwa, mibali lokola basi, bino, baoyo botikaka basi na bino básala makambo ya ndenge wana, yango ezali kotalisa oyo bino bosálémá na yango. Yango wana bozangi Molimo Mosantu ndenge bókotátola, soki te bolingaki kozala na Eloko moko oyo ekosala ete ábika lokola mwasi ya solo mpenza na ntango nyonso oyo akobika elongo na yo, ata ndenge nini. Amen. Ezali koyokana lokola makambo ya kala, ékozokisa. Kasi yango nde lingómbá esengeli na yango lelo, kosukulama nde na Molimo Mosantu na lolenge ya kala, kotandama, kokaukisama, pe kongomama na Molimo Mosantu. Ya solo!

⁵² Lolenge oyo mpenza mokili emikotisi kati na yango! Ndenge bákobima na balabala pe kobikáká! Ndenge bokófandela televizió mokolo ya misato na mpokwa, pe bokokende losambo te! Ndenge bo. . . Ee, kasi ezali ata na mwana moko te na ekólo. . . oyo azangí koyeba nionso nani oyo David Crockett azali. Ná lokuta wana ya salite, kolobáka ete abomaki ngombolo ntango azalaki na mibu misato, boyebi ete ezali lokuta, kasi bokotika bana na bino bátóndisa mitó na bango na makambo yango. Pe ata mwana moko te kati na bana mokámá atikalá koyeba eloko moko na ntina na Yesu Klisto. Ezali mpo mokili oyo esili kobeba mpenza! Ekólo oyo, na bozoba mpenza pe ekei mosika mpenza na Nzambe, bwakisi Molimo Mosantu.

⁵³ Oh, okoloba: “Nakendeke losambo pe nagángaka.” Okoki kosala yango. Kasi, na ntango oyo Mwana-mpate ya Nzambe, ya bopolo, akoti naino kati na motema na yo te, mpe apetolisi yo

bomoi na yo pe akomisi yo kobika lokola moto oyo abongwani, ekosunga yo ata moke te na komekoláká Boklisto. Osengeli kozala na Yango. Amen!

⁵⁴ Nakendeki na ndako moko awa kala mingi te, mpo na kotala mobali moko azalaki kobela, pe mwasi moko azalaki, afandaki wana. Bongo mwa Oswald moko akotaki, na ekoti atengamisá na motó na ye, alobaki: “Mama, bilei ebeli?”

⁵⁵ Alobaki: “Cherí, tozuaki ntango te,” alobaki, “na ntongo oyo, mpo na kolamba bilei.” Alobaki: “Nákosalela yo sandwich,” alobaki, “mwa malálá ezali kuna.”

⁵⁶ Apusanaki pe azuaki lilálá moko, atali yango, akanoli yango, abambi yango na etutú na makasi na ye nyonso, mai na yango etangaki, alobaki: “Soki yango nde nyonso oyo bozali na yango na esika oyo, boye nakei na ngai,” ndenge wana.

⁵⁷ Namilobelaki: “E Nzambe, esengelaki ázala mwana na ngai mpo na mwa miníti mitano!” Oh, nalingaki konika poso na ye, na ndenge ete alingaki koyeba ata moke te ete banikaki yango! Kasi bango bafandaki wana, koyokeláká ye mawa pe kobóndeláká ye. Oyo ye asengeli na yango ezali kofiakola na ndenge ya kala, oyo elongolaka poso. Yango nde tosengeli na yango, mabota ya lolenge ya kala lisusu, pe batei oyo bakotelema sima na eteyelo mpo na koteya Solo, pe kotalisa Yango epai Yango esengeli étalisama. Amen. Ya solo. Oh! la la!

⁵⁸ Mariya moke abetibeti mwa makolo na ye na nse, atómboli mwa zólo na ye likolo pe abaloli mwa bibebú na ye ya lánge ya róze (na bisangisásangisá ya Max factor), atómboli mwa motó na ye likolo pe abimi libanda na ndako. Oyo nsoni mpenza! Ndenge bana bazali lisusu kotosa te! Biblia elobá ete bakokóma bongo. Makomi elobá ete bakokóma bongo. Ndenge bakokóma kobika, ndenge bakokóma kosala, ná makambo oyo ezali kosalema na mokili lelo, ezali mpo bayokisi Molimo Mosantu mawa pe atangwe mosika.

⁵⁹ Mwa mibú euti koleka. Nazokokende sasaipi, sima na mwa mikolo, kosepela bokundoli ya bokiti ya liboso ya Molimo Mosantu na Amerika, ekokokisa mibú ntuku mitano mobú oyo, na mayangani ya kala ya Balabala Azusa, mayangani ya ba-Pantekotiste na Los Angeles, epai oyo Molimo Mosantu ekitelaki bango mbala ya liboso, ntango bato basanganaki. Ntango Klisto akitaki epai na bato yango, bazalaki mpenza na bopolo pe na kimia. Bazalaki kobika bomoi ya búlee. Bazalaki kobika bomoi ya komípesa mbeka. Bazalaki kolinga komípesa na kotosa. Bazalaki kolinga kokambama na Molimo Mosantu. Bazalaki kokipé oyo bato bazalaki koloba te, ete “basilá ngala”, ata soko balobaki ete bazalaki “libómá” to soko nini, bandimaki kokambama na Molimo Mosantu.

⁶⁰ Kasi, lelo, oh! la la! ná elóko ya kopakola púdre pe boíte ya kotia maquillage, alati kupé, pe ye wana na balabala, ee, ezali

nsoni! Pe bákomiobelaka éte “bazali na Molimo Mosantu”. Oh, okoloba: “Kasi nalobá minoko ya sika.” Iyo, zabolo alobaka pe, lokola. “Oh, nagángá.” zabolo agángaka pe, lokola. Zabolo akoki komekola makambo nyonso oyo Nzambe azali na yango, longólá bobele bolingo, akoki komekola bolingo te. Iyo.

⁶¹ Bongo, eloko ya liboso, ntango obandi kosala makambo wana, ofungóli nzela, obandi kokakola, bongo mwa koyimayima ebandi na losambo, bitónge kati na bango, pe oyo alobi: “Boyebi, mokengeli azali mpenza *boye na boye*,” to “mosungi azali *boye na boye*.” Pe, eloko ya liboso eza ete, oyoki yango! Pe yango wana tosili kozua mindondó mingi, ezali mpo bobandi koyoka zabolo, bongo ózwa konguluma na esika ya koyoka Ebengá ya bopolo, Molimo Mosantu, Ebengá ya Nzambe oyo akolinga kokamba bino pe kotambusa bino, kolinga bino pe kopambola bino.

⁶² Mbala ya liboso kaka obandi kosilika mwa moke, Ebengá apumbwé na mbala moko. Ya solo. Akokaka koyíkela yango mpíko te. Lolenge na Ye ezali ya kokesana. Oh, Akokaka ata moke te koyíkela yango mpíko. Pe ntango obandi kotónge mozalani na yo, Ye akokoka koyíkela yango mpíko te, Ye akosepela na yango te. Akopumboa pe Akei. Akokoka koyíkela yango mpíko ntango molayi te. Ebengá azalaka na bopolo. Ebengá azalaka na komikitisa, pe Ebengá, pe—pe Ekoki te kofanda likolo na eloko mosusu te, longólá bobele soki ezali na lolenge ya ndenge moko.

⁶³ Sikawa, Nzambe akoki kosala yo na lolenge moko mosusu, mobali to mwasi, Akoki kopesa yo lolenge moko mosusu. Okoloba: “Ee, Ndeko Branham, tokoki kosala nini mpo na yango?” Kómá kaka mwana-mpate lisusu. Ezali bobele bibwélé mibale oyo ekosanganáká esika moko, ebengá ná mwana-mpate. Ebengá ekoya epai na eloko mosusu te bobele na mwana-mpate. Pe soki okómá ntaba, boye longólá molimo wana ya ntaba ya kala kati na yo. Ya solo. Soki osili kokoma eloko mosusu, bwaká yango mosika na yo, soki obandi kokóma moto na songísongí.

⁶⁴ Talá mokolo moko, nateyaki na makasi nyonso oyo nakokaki koteya na yango na engumba moko boye, pe bato nkoto na nkoto bazalaki wana. Nabengaki bato na etumbelo. Nakanisaki ete nalobelaki masumu na lolenge na yango nyonso, nalobelaki nyonso oyo nakokaki kokanisa. Na mpokwa wana sima na liyangani kosila, mwa mwasi moko na makambu lokola ya malam mpenza apusanaki, alobaki: “Ee, Ndeko Branham, nasepeli mingi ndenge osimbi ngai te na mpokwa oyo.”

Namilobelaki: “Oyo asengeli kozala Moklisto ya solosolo.” Alobaki: “Osimbi ngai te na mpokwa oyo.”

⁶⁵ Nalobaki: “Ee, nasepeli solo koyoka yango, madame, osengeli kozala pembeni na Bokonzi ya Nzambe.” Pe akendeki na sóngé ya misapi ya makolo.

66 Mwasi moko ya mobangé azalaki wana. Nalobaki: “Talá, oyebi mwasi wana?”

“Iyo.”

Nalobaki: “Asengeli kozala Moklisto ya solosolo.”

67 Alobaki: “Ezali na likambo moko oyo ozangi kobeta na mpokwa oyo, Ndeko Branham, ezalaki nde songísongí. Ye nde mama mokonzi ya songísongí na mboka oyo.” Yango mpenza, yango nde, bomoni.

68 Kasi na ntango ozuami na moko na makambo wana, ata soki motei abeti yango na eteyelo to te, na ntango omoni makambo wana ya mosuni, ya mokili, na ntango nyonso oyo ozali kopesa yango nzela, ozali mosika na Nzambe, pe Molimo Mosantu akotikala mosika. Yango nde ntina oyo mayangani ezali lisusu ndenge ezaláká te. Yango nde ntina oyo bazali lisusu kosalela nzela ya mposo ya mabaya te na tabernacle. Yango nde ntina oyo mayangani minene na hema ezali te na ekólo mobimba, ezali mpo tosili koyokisa Ebengá ya Nzambe, ya bopolo, mawa pe Akei na Ye. Ya solo. Akotikala elongo na biso te na ntango nyonso oyo tozali kokipé te, na ntango nyonso oyo tozali kotongana: “Tolingi esálema na ndenge na biso!”

69 Sikawa, nalingi ete bótala malamú, Mwana-mpate yango azalaki Mwana-mpate ya kimia. Biblia elobi: “Afungolaki monoko na Ye te. Lokola mpate liboso na bakáti nkunza, Afandaki kimia.” Afungolaki monoko na Ye te. Azalaki moto oyo alukaka makoki na ye te. Te, misie, Abelemaki mpo na kosundola makoki na Ye. Azalaki Mwana-mpate ya kimia.

70 Kasi, lelo, oh! la la! Ndenge tolingaka mpenza kokangama na ndenge na biso ya komona makambo! Oh! la la! “Nalobi na yo, moto moko áloba na ngai likambo, nakokende kolokota ye, eh, nakosilisa ye.” “Nakolobela mobange ya mwasi wana ya lokuta, soki namoni ye! Yo zela kaka ntango nakomona ye! Nzambe ápambolama, aleluya! Ah-ha!” Ebengá apumbwé na Ye pe akei mosika. Ya solo. Molimo Mosantu azali lisusu na yo te, na ntango nyonso oyo ozali komiyoka bongo. Komá yango na búku na yo, Ekozala na yo ata moke te. Molimo Mosantu akolinga kozala na zinga-zinga ya esika oyo molimo ya ndenge wana ezali te. Esengeli ézala molimo ya mwana-mpate, molimo ya bopolo, soki te Ekofanda esika moko ná yango te, nde ndenge wana nde ezali; soki yango ezali na bopolo te, na komikitisa te, pe ekambami na Molimo Mosantu te. Pe soki likambo moko esalemi, Ekomona ata yango te, bobele kokobáká. Bomoni? Pe kaka na ntango oyo ebaluki pembeni, boyebi, na mbala moko . . . ntango obaluki pembeni.

71 Boyebi, lisumu ya liboso ebandaki ntango moto moko abalukaki pembeni kaka mwa moke. Boyebaki yango? Biblia elobi bongo. Eva abalukaki pembeni mwa moke kaka, mpo áyoka oyo Satana alingaki koloba, pe atalisaki ye likambo yango

malamu mpenza na lolenge ete akanisaki ete ezalaki Solo. Pe ayokaki ye.

⁷² Pe eloko bobele moko oyo zabolo alingi ete ósala, ezali ete óbaluka pembeni mpo na mwa miniti moke kaka. Akoki kotalisa likambo yango, koloba: “Sikawa, tala. Oyebi, ndeko mobali, oyebi, ndeko mwasi, soki bazalaki bato oyo ya malamau, balingaki kosala *oyo* te. Soki básálaka ata *oyo* awa, oyebi.” Akoki kotalisa yo yango lokola likambo ya solo mpenza na lolenge ete ekómi mpenza solo. Ya solo! Kasi bobosana te, ezali zabolo!

⁷³ Nakokipé te ata soki bakwei na nse ndenge nini, soki bazindi kati na masumu ndenge nini, mosala na yo ezali ete ózinga bango na loboko na yo pe ótóbola bango na bolingo ya Nzambe. Yo ozalaki wapi ntango Ebengá ya Nzambe abimisaki yo na potopoto? Yango nde mosala na yo, moninga na ngai. Mokili oyo ezali na mposa makasi ya ata mwa litanga ya bolingo. E . . .

⁷⁴ Nalingi ete bójala ebwélé oyo, pe, mwa ebwélé oyo, azalaki mwana-mpate moko ya kimia mpo e . . . ntango bafingaki Ye Azongisaki kofinga te. Alobaki maloba ya nkanda te ná bilobá-loba, kotomboka, kosuána-suana pe bongo na bongo, Asalaki yango te. Ntango moto . . . Ntango bafingaki Ye, Ye azongisaki kofinga te. Afungolaki monoko na Ye te.

⁷⁵ Kasi tiká moto moko ásala yo to ngai likambo moko, oh! la la! tokotomboka lokola ligóródó alei lisasi ya monene, tokovimba lokola—lokola mobangé ya libata. “Nalobi na yo sikawa, soki asakání na ngai lisusu ndenge wana, nakozonga lisusu na losambo ya kala wana te. Te, misie! Nzambe ápambolama! Aleluya! Ba-Nazaréen bakoyamba ngai, ba-Pèlerin de la Saintété, bango bakozua ngai. Aleluya. Nazali lisusu na ntina ya kosala yango te.” Malamau, Ebengá apumbwé na Ye.

⁷⁶ “Boyebi nini? Soki mobangé wana bilongi mibale akeyi na losambo wana, ngai nakokende lisusu kuna ata mokolo moko te. Nzambe ápambolama, nakosala lisusu yango ata moke te!” Na ntango eloko wana ebeti yo, mbwala mabe wana ya zamba, Ebengá apumbwé na Ye. Ya solo. Boye Molimo Mosantu akeyi.

⁷⁷ Na sima ókomituna likambo nini ná yo. Ókomituna likambo nini ná lingomba yango. Okomituna likambo nini ná yo. Mpo na nini ozali na elóngá te ndenge ozaláká na yango? Obongoli lolenge na yo. Okómi ntaba mobali na esika ya kozala mwana-mpate. Okómi eloko mosusu kasi mwana-mpate te.

⁷⁸ Esengeli na yo kozua Molimo wana ya bopolo mpenza, “Tiká ete Molimo Mosantu ákamba ngai bisika nyonso. E Nzambe, nalingi mosumuki nyonso, atako soki bazali wapi.” Na ntango mposa ya ndenge wana ekoti na motema ya moto, boye okomona likambo moko kosalema, elimo na yo.

⁷⁹ Okoloba: “Ee, Ndeko Branham, eyano moko ezali mpo na yango?” Iyo, kómá kaka mwana-mpate, esili. Okoloba: “Ee, Ndeko Branham!”

⁸⁰ Nakutanaki na elenge mwasi moko mokolo mosusu wana na mpokwa, kuna na Shreveport. Ngai ná Billy tokendeki na esika moko mpo na kolia sandwich sima na liyangani kosila. Elenge mwasi moko ya kitoko akotaki wana, akokaki kozala elenge mwana mwasi, to ya mibu ntuku mibale to eloko moko ya ndenge wana, alataki malamau. Afandaki. Namonaki ete azalaki kaka kotala na ngámbo wana. Nakóbaki na ngai kaka kolia. Sima na miníti moke madame moko akotaki. Alobaki: “Ndenge nini?” Asololaki na ye. Pe nayebi ete mwasi yango ezalaki Ndeko mwasi Davis oyo kuna. Ná ye ná madame mosusu ya Life Tabernacle, nayebaki bango malamau, ayaki epai biso tozalaki pe asololaki na ngai, pe alekaki. Na sima elenge mwasi oyo afandaki na ngambo mosusu, alobaki: “Ndeko Branham, ezalaki Liteya moko kitoko na mpokwa oyo.”

⁸¹ Nalobaki: “Boni yo, ndeko mwasi?” Nalobaki: “Mersí, mingi mpenza.” Pe nalobaki: “Ozali mondimi ya Life Tabernacle?”

⁸² Alobaki: “Iyo.” Alobaki: “Oyebi, Ndeko Branham, nakokaki koyemba na korále, kasi bazali na mobeko moko kuna.” Alobaki: “Nasalá, oh, mibú ebele mpenza mpo na koyekola kobongisa mongongo, pe nyonso wana.” Alobaki: “Nayémbá ba-soló pe nayémbá ba makambo misusu.” Alobaki: “Kasi, na—nakokaki koyemba te, mpo bazali na—bazali na mobeko moko oyo elobi ete ‘mwasi oyo apakoli elongi akoki koyemba—koyemba na korále te.’”

Nalobaki: “Ee, nkembo na Nzambe mpo na Life Tabernacle!”

⁸³ Alobaki: “Ee, nakoyebisa yo, Ndeko Branham,” alobaki, “ngai nazali Moklisto.”

⁸⁴ Nalobaki: “Boye, ndeko mwasi, zongá ndako pe sukólá elongi na yo, to nyonso oyo okosala.” Nalobaki: “Olingi koloba na ngai ete okondima mwa eloko ya boye lokola kopakola mwa biloko wana na elongi na yo . . .”

⁸⁵ Pe nakoki kotalisa bino polele ete likambo yango eútá epai ya zabolo. Nakoki kotalisa bino polele ete eloko moko te kati na . . . Ebandeli na yango ezalaki nde epai ya bapakano. Pe na ntango nyonso oyo bozali kopakola yango, yango ezali elembo ya bopakano. Sikawa, nauti na Afrika kala te, pe nazalaki na kati ya zamba monene ya ba-Hottentot pe namonaki mpenza epai biloko ya matoi, epai biloko nyonso wana eútá, pe nyonso oyo, mayaka ebele oyo botóndisaka na kingo, na matoi pe na nyonso wana, epai yango eútaka. Ezali nde bapakano. Kasi Biblia elingi te ete Moklisto ázala mopakano. Pe bolingaka te . . . nalobi te ete ozali mopakano mpo osali yango, kasi ozali nde komikómisa lokola mopakano. Ezali mpo mokengeli na bino ayebisaki yo Solo te. Biblia elobi bongo.

⁸⁶ Pe sikawa okoloba: “Ndeko Branham, nakanisi ete soki nazali na suki ya mikuse, epesaka ngai mwa mpío pe nyonso

wana.” Ya solo, kasi soki ozalaki na suki ya milai elingaki kopesa yo mpío mingi koleka. Ekolongola yango nyonso wana na kingo na yo, kokanga yango liboke ná kobongisa yango.

⁸⁷ Ee, boyebi oyo Biblia elobi? Ete, mobali azali na makoki ya koboya mwasi na ye pe kokabwana na ye soki akati suki na ye. Soki akati suki na ye, elakisi ete azali kobika sembo na mobali na ye te. Biblia elobi bongo, Bakolinti ya Liboso 12, bótala soki Ezali bongo te. Ye oyo. . . Mwasi oyo akati suki na ye abebisi lokumu ya motó na ye, oyo ezali mobali na ye. Pe soki azali mwasi azanga lokumu, esengeli kokabwana pe kotangwana na ye. Ya solo. Kasi, bomoni, mokengeli ayebisaka bino makambo yango ata moke te. Pe ntina wana nde bosalaka ndenge bozali kosala. Pe—pe mobali, Biblia elobi. . .

⁸⁸ Awa na mikolo euti koleka moto moko akomelaki ngai pe alobaki: “Ndeko Branham, ba—bablúze oyo basi bazalaka na yango,” alobaki, “ee, ekómi mpenza e. . . ekómi mpenza mpasi komona lisusu bablúze, pe ekozala mabe te mpo na biso basi Baklisto kolata baoyo ya dacron, ya nylon, to ata oyo ya ndenge wana?”

⁸⁹ Nalobaki: “Tala, ndeko mwasi, yoka náyebisa yo likambo moko. Oyo nde likambo ya solo. Okoki kosala boye: soki okoki kosomba yango te, batekaka ba—masini ya kotonga bilamba, okoki kotonga yango.” Nalobaki: “Ya solo. Kokómisa yango kaka. . .” Ngai nandimi. . . Boyebi, eloko oyo ezali na kati ya motema na yo nde emonisamaka yango moko na libanda. Misala na yo pe bizaleli na yo nde etalisaka eloko oyo ezali na kati na yo.

⁹⁰ Yango nde ntina kotombokelana nionso oyo, koswána pe koweelana, pe—pe kotongana, ná makambo ya ndenge na ndenge na lingomba, yango nde ezali kokabola losambo. Yango elakisi ete zabolo asili kokotela bino, pe elakisi ete Molimo Mosantu asili kotika bino. Sika, nayebi ete ezali kosala mpenza mpasi na bamosusu kati na bino, kasi esengeli ésala yango. Esengeli mpenza! Yango nde ntina oyo yango elobami; mpo na komilakisa te, mpo na komitalisa te; kasi mpo na koyebisa bino epai mbeba ezali, mpamba te mokolo moko ekosengela na ngai kotelema mpe kosamba na ntina na bino. Pe ntina wana mpenza ndenge obikaka pe ndenge ezalelaka, yango nde etalisaka oyo yo ozali. Soki ozali na ezaleli ya kosilika—silika mpamba mpamba kaka mpo na mwa likambo moke, bongo obimi pe okei kosala bozoba, to kotóngá, to koloba bosoto ná makambo ya ndenge wana, yango ékotalisa esika nini yango ezali kouíta.

⁹¹ Boye likambo ya kosala ezali kaka moko, bimísá eloko yango libanda, pe Ebengá akozonga na motema na yo. Ntango ebengá abimaki libanda na masúwa, babimisasi ye kobimisa. Kasi azongaki pe abetaki na ekuke wana ya masúwa kino ete Nowa akotisaki ye. [Ndeko Branham abeti eteyelo—N.D.E.] Molimo Mosantu azali awa. Molimo Mosantu azali na mposa

ya kokota. Yango wana lelo, Molimo Mosantu, Atíká yo libela te. Efandi bobele libanda, na bitápe ya banzete na esika moko boye, ebelemi mpo na kozonga pe koya kati na yo, pe kopesa yo bolingo, kimia pe esengo oyo ozaláká na yango. Iyo, Ebelemi. Abelemi kosala yango. Alingi kosala yango. Azali na mposa makasi ya kosala yango. Kasi olingi na yo kotika Ye ásala yango te!

⁹² Sikawa, nazoloba na bino bapaya te. Nayebi te oyo mokengeli na bino. . . Nazoloba nde na Branham Tabernacle. Nazoloba na bino baoyo bouíti na balosambo mosusu te. Nazali koloba nde na Branham Tabernacle. Yango nde likambo ezali awa.

⁹³ Yango nde esalaka ete Ebengá Yango épumbwa. Yo tika kaka moto moko ábanda mwa likambo moko na losambo, eloko ya liboso, “Oh, ezali nde bongo? Oh, bo. . . ? Ya solo mpenza?” Kaka na ntango yango Molimo Mosantu akei, apumbwé. Ekokaka koyíkela molimo ya ndenge wana mpíko te. Na ntango nyonso oyo lolenge wana ya mwana-mpate etiki yo, Molimo Mosantu pe akei. Ya solo. Pe wana nde pkokoso lelo. Ntina wana nde bato bakómi na lolenge oyo bango bakómi, ezali mpo bákotika molimo mabe ékota na motema na bango, na bomoi na bango. Sikawa yango wana tokómi na. . .

⁹⁴ Biblia elobi yango nde ntina oyo babeli pe bato na mawa bazali mingi kati na biso, ezali mpo na makambo ya boye. Esengeli tózala na bopolo. Esengeli tózala bato na kimia. Esengeli tózala mwana-mpate, mpo Ebengá áumela elongo na biso.

⁹⁵ Sikawa, bóbosana te, Ebengá akoya. Alobaki: “Oh, Ndeko Branham, koloba na ngai te ete natikálá koyamba Molimo Mosantu te. Aleluya! Kuna, mokolo moko na butu, oh, ntango Akotaki, nakokaki ata kotambola. . .” Ya solo, wana ezalaki Ye! “Oh, namiyokaki malamú mpenza, namiyokaki lokola ete nakokaki kozua mwa ndeke moko moko oyo afandi na nzete, koyamba yango pe kotalisa yango bolingo. Moto ya motema likundu koleka, oyo asálá ngai eloko soko nini, namiyokaki lokola nakokaki kotia loboko na ngai na zongazonga na ye pe koyamba ye. Oh, Ndeko Branham, namiyokaki malamú mpenza!” Ya solo, ezalaki Molimo Mosantu.

⁹⁶ Kasi, bomoni, ntina oyo Ye akokaki koumela te. Ozaláká mwana-mpate na ntango wana; kasi na ntango okómi mbwa ya zamba, esengelaki épumbwa na Ye. Mabe moko te ezali ná—ná—ná Ebengá; ezali yo nde, pe yango. . . otiki molimo yango éyela yo. “Ngai moto natikaki yango, Ndeko Branham?” Iyo, ntango obandaki koyoka matóngi wana, ntango oyokaki lokuta wana, ntango obandaki koloba: “Ee, ezali makoki na ngai!”

⁹⁷ Ozali na makoki ata moko te! Osómbami ná ntalo, yango ezalaki ntalo ya Makila ya motuya ya Mwana na Nzambe.

Mobeko moko te epesi yo makoki yango. Aleluya! Makoki se moko oyo ozali na yango, ezali, koya nde na Liziba etóndá na Makila oyo eúti na Misisá ya Emanuele, ntango basúmuki babwakami kati na yango, mbindo nyonso ya mabe na bango ekolongwa. Iyo, mesie. Yango nde makoki se moko oyo ozali na yango, ezali nde kótika mokáno na yo moko, epai na Nzambe, na sima nde Nzambe ákóma kokamba kobanda wana. Yango nde esalaka ete mayangani. . . Yango nde esalaka ete makambo mingi ya ndenge ézala. Okomona Molimo Mosantu akokende na esika moko boye, Molimo Mosantu alobi: “Oyo ezali malamau te. Káta mayangani, kende liboso.” Nakokata yango pe, ndeko, pe nakokóba liboso. Ya solo, mpo esengeli ókambama na Molimo ya Nzambe. Pe nzela bobele moko mpo na kokambama na Molimo ya Nzambe, ezali kokoba kozala na bopolo, koyeba nde ebele te.

⁹⁸ “Oh,” okomilobela, “nayebi makambo ebele.” Iyo, okotisi makambo ebele na bongó na yo pe ékokoka kutu kosala malamau te. Oyebi babúku nyonso pe biyano nyonso, ki-Gréki nyonso pe ki-Ebré nyonso, kasi ozángi ná esika mpo na Ebengá ákita. Ya solo. Kasi yo oyebi nyonso, boye Ebengá akoki kokamba te, mpo oyebi mingi.

⁹⁹ Mwana-mpate abétaka ntólo te ete ayebi eloko. Esengeli ázala na moto mosusu mpo ákamba ye. Nkembo! Ezali bongu. Ayebi eloko te! Amen. Eloko bobele moko oyo nayebi, ezali ete, Klisto Yesu akufaki mpo na kobikisa ngai.

¹⁰⁰ Kuna na Kaliforní, moto moko azalaki kotambola, alataki likomí liboso na ye, oyo elobaki: “Nazali libóma mpo na Klisto,” pe na mokongo elobaki: “Yo ozali libóma mpo na nani?” Ya solo. Kómá libóma, liboso na mokili, mpo ókambama na Molimo Mosantu, mpo bana na Nzambe ya mibali ná ya basi bakambamaka na Molimo Mosantu. Baroma 8:1, elobi: “Yango wana sikawa kokweisama ezali te mpo na baoyo bazali kati na Klisto Yesu, baoyo balandaka nzoto te, kasi Molimo,” baoyo balandaka mbwa ya zamba te, kasi Ebengá. Amen.

¹⁰¹ Doc azaláká koyemba loyembo moko: “Tóndisa ngai mikolo nyonso na bolingo, wana nazali kotambola elongo na Ebengá ya Lola; tiká ete nátambola ntango nyonso ná loyembo pe na komungamunga, tóndisa ngai mikolo nyonso na bolingo.” Oyo ekozala mpenza mokolo moko ya kimia mpo na Branham Tabernacle, to mpo na losambo nyonso mosusu to moto nyonso, ntango bakosundola makoki na bango, mpo na kokóma mwana-mpate.

“Násala nini, Ndeko Branham?”

¹⁰² Zongá mwana-mpate, zongela kozala na bopolo, zongela kozala oyo ayebi eloko te, zóngela bobele komitika epai na Klisto. Komeka te, komeka koyeba eloko moko te. Tambola kaka na kosókema, na kimia, na komikitisa, na bopolo, pe Ebengá akokamba yo. Kasi na ntango nionso oyo omoni. . .

obandi koyoka matóngi wana, na ntango nionso oyo obandi kotomboka, na ntango nionso obandi kokanisa ete ozali na makoki ya kosala *oyo* pe kosala *wana*, Ebengá akopumbwa na Ye pe akei. Na ntango wana ozali na Yango lisusu te. Sikawa, azali mosika mingi te na bino na ntongo oyo, losambo. Atelemi libanda likolo na étápe ya kimia, kozeláká ete lolenge na yo ébongwana. Amen.

¹⁰³ Oyo bosengeli kosala lelo ezali kotika makoki na bino nyonso, ezali kotika Nzambe alalisa bino na nse pe ákókola makoki na bino nyonso. Amen. Bokoki kokanisa mwa mwana-mpate, ná nku—nkunza na ye nyonso? Elingi koloba makoki na ye. Iyo. [Ndeko Branham amekoli mwana-mpate oyo amelí péma—N.D.E.] Molunge ebeti ye, na sima batandi ye na mesa ya kokókola nkunza. Bango bayebi oyo ebongi mpenza mpo na ye. Babotoli ye makoki na ye nyonso pe bakókóli ye mobimba, molunge pe bozito esili, pe tálá ndenge ákopota mbangu. Oh! la la! aseveli, pe akómi kopumbwa-pumbwa pe kosakana na esengo nionso. Iyo, misie. Soki osundoli makoki na yo, yango nde okozua. Kasi ékosenga ósundola makoki na yo pe ótika Liloba na Nzambe ékókola yo mokili nyonso, élongola yo mimesano nyonso ya mokili, bongo ókóma ekelamu ya sika kati na Klisto.

¹⁰⁴ Mokolo moko, kuna na Afrika, nazalaki kosolola na—na mosantu moko ya kala. Alobaki: “Ndeko Branham, nayebi ete ondimakama bikamwa.”

Nalobaki: “Ya solo, ndeko na ngai.”

¹⁰⁵ Alobaki: “Eleki mibu ebele nazalaki kokanisa ete nazalaki moto monene.” Alobaki: “Nazalaki kokanisa ete nazalaki mpenza Moklisto.” Pe alobaki: “Bongo kuna na losambo na biso. . .Ezalaki kosenga námata mwa ngomba moko, na epai nazalaki kotelemisa mwa motuka na ngai.” Pe alobaki: “Ezalaki kosenga námata mwa ngomba moko, oh, ya métre soki nkama misato to minei, bongo kozunguluka ngambo na mwa matiti pe biloko ya ndenge wana, mpo nákóma kuna.” Pe alobaki: “Tozalaki kosala liyangani ya mabondeli kuna.” Pe alobaki: “Nazalaki kokanisa ete nazalaki mpenza Moklisto.” Alobaki: “Nayebaki Biblia mobimba. Nayekolaki ki-Ebré nyonso. Nayekolaki elobeli ya Makomi nyonso na ndenge elongobani.” Pe alobaki: “Soki moto moko ayei epai na ngai, nazalaki na makoki” [Ndeko Branham alelisi mosapi na ye—N.D.E.] “koyanola ye na mbala moko na oyo etali Biblia. Nayebaki oyo nazalaki koloba.” Alobaki: “Na mpokwa moko nazalaki kokende na losambo. Kowélana ezalaki mingi kati na losambo na biso.” Alobaki: “Mwa bitóngá mike-mike ezalaki kotelemelana moko na mosusu. Oyebi ndenge esalemaka.”

Nalobaki: “Iyo, misie.”

¹⁰⁶ Alobaki: “Ntango nazalaki komata mwa ngomba yango, nazalaki kotambola, pe na mbala moko nasosolaki ete moto

moko azalaki kolanda ngai.” Pe alobaki: “Namilobelaki ete nokozela moto yango mwa moke ata soki ezalaki nani, mpo ápusana, pe nákosolola na bango mwa moke wana tozali komata nzela.” Boyebi, wana ezali tóloba likambo ya malamumu, ózela kaka mwa moke. Pe alobi: “Wana nazalaki komata mwa ngomba yango,” alobaki, “nazalaki komata. Mobali moko azalaki komata mwa ngomba yango,” pe alobaki: “Azalaki na mokumba moko na mokongo na Ye, ya monene mpenza, koleka Mobali yango.” Pe alobaki: “Azalaki komela péma pe kopéma mbangu-mbangu, pe kotambola malembe-malembe, komekáká komata. Bongo nalobaki: ‘Moninga, nakoki kosunga Yo mpo na komema mokumba oyo kino na likolo ya ngomba?’ Alobaki: ‘Te, Ngai nde nasengeli komema yango.’” Alobaki: “Natalaki loboko na Ye,” alobaki, “na ntango yango nde nasosolaki ete ezalaki emononeli. Azalaki na bilembo ya mpota na loboko na Ye.” Alobaki: “Nakweyaki na nse, pe nalobaki: ‘Nkolo, Omemi nde masumu ya mokili mobimba na sáki wana?’ Alobaki: ‘Te, Namemi bobele oyo ya yo. Nazali bobele kosunga yo komata ngomba yango, kaka mpo ókóka komata.’”

¹⁰⁷ Ezalaka nde ndenge wana. Soki totali nzinga-nzinga, tokomona ete Amemi nde oyo ya biso. Yango esali te ete bómiyoka moke? Motema na biso ya mabe, ya nkanza, kaka mpo tokoki kosala yango!

¹⁰⁸ Eleki mwa ntango awa nazalaki na bokila. Ndenge boyebi, nalingá bokila. Pe moto mabe moko azalaki na etúká wana, azalaki moto mabe. Pe azalaki kolinga kotiola ngai mpo nazalaki koboya koboma bamama pe bana ya mbólókó. Nalobaki: “Ezali kozala motema makasi.” Nalobaki: “Mpo na nini oboi kozala moi bokila moko ya malamumu pe ya bosembo, oyo akoboma banyama ya mibali oyo ekólí pe banyama oyo enuní, oyo ekómi pene na liwa? Nzambe apési biso bango. Tíká bamama bilenge pe bana . . .”

¹⁰⁹ Alobaki: “Ah, oza bibángá-banga, motei!” Akobaki kolobela ngai ndenge wana.

¹¹⁰ Nalobaki: “Sikawa, tala, soki nazali na nzala pe nayoki mposa ya mwana mbólókó, nandimi ete Nzambe akotika ngai názua yango. Kasi koboma yango kaka mpo na elengi ya koboma,” ee, azalaki kotondisa likalo mobimba ná bango. Pe akendeki komisalela eloko moko ebélelaka, lokola siflé, pe soki abeti siflé yango, ezalaki mpenza lokola kolela ya mwana mbólókó. Mokolo moko tozalaki elongo na kati ya zamba. Nayokisaki ye nsoni, nalobaki: “Soki ezalaki ngai nalingaki komiyokela nsoni.” Azalaki koboma bana mbólókó mwambe to zomi na mbala moko, soki akokaki, bamama mbólókó pe nyonso, kaka mpo na elengi ya koboma, azalaki kokata ntango mosusu eteni ya makolo pe asundóli oyo mosusu wana. Nalobaki: “Osengelaki kosala bongo te.”

“Ah,” alobaki, “bino batei boleki bibángá-banga!”

¹¹¹ Mokolo moko azalaki na kati ya zamba, azuaki siflé yango pe abetaki yango, pe eyokanaki lokola mwana mbólókó azali kolela. Kaka na ntango asalaki yango, mama mbólókó moko ya kitoko abimisaki motó, abimaki malembe-malembe. Okokaki komona ndenge miso na ye ya minene pe ya mwa motane ezalaki kotala. Asutukaki. Azalaki kotála-tala. Moi bokila yango atombolaki bondóki na ye, atiaki yango na lipeka mpo áboma mama mbólókó yango. Pe mama mbólókó yango amonaki moi bokila yango. Kasi, boyebi nini, mpo na kolela wana ya mwana mbólókó wana, amonaki bondóki yango te. Azalaki nde koluka bebé yango; ezalaki na kókósó. Boyebi, atalisaki mpenza bomama ya solosolo pe bolingo ya mama, ndenge ayaki mpenza liboso na bondóki wana, liboso na liwa, kotaláká yango na monoko ya bondóki wana. Boyebi nini, kotalisama yango ezalaki mpenza makasi, na lolenge ete esimbaki ye, abwakaki bondóki na ye na mabelé! Azongaki mbangu pe ayambaki ngai, alobaki: “Billy, bondela mpo na ngai, nalembi likambo oyo!” Ntango amonaki kotalisama ya mpiko ya bomama wana!

¹¹² Oh, ntango mokili ékomona kotalisama ya bolingo ya Nzambe, pe bomoto na mitema na biso, oyo bokeseni mpenza ekozala. Na ntango totiki ete Ebengá ya Nzambe áyá na mitema na biso pe ákomisa biso bopolo, ápesa biso kosokema.

¹¹³ Kuna na kati ya zamba wana, nabondelaki mpo na mwana mobali yango kuna, namemaki ye epai na Nkolo Yesu. Bandá wana, akómaki moi bokila ya malamumu pe ya bosembo.

¹¹⁴ Na ntembe te, akanisaki ete ezalaki makoki na ye, akosala oyo ye alingaki kosala. “Bazali na mabelé na ngai, baliaka ndunda na ngai kuna soki balingi.”

¹¹⁵ Nalobaki: “Ya solo, kasi kosala bongo ezali kozanga bomoto.” Esengeli ósundola makoki na yo. E Nzambe, yokela biso mawa, ete tósala yango.

¹¹⁶ Eleki mwa ntango awa, na, oh, eleki mibu penepene mokama, Moklisto monene moko azalaki kofanda na sud-west ya Etats-Unis. Nkombo na ye ezalaki Daniel Curry, moto malamumu mpenza, moto na Nzambe, mosantu, Moklisto ya solosolo, moto oyo bato nyonso bazalaki kosepela na ye, moto malamumu mpenza. Pe yango ezali, ete akufaki to akotaki na molimo, pe alobaki. . . ntango amataki na Likoló, na ntembe te, ntango akufaki. Pe ntango akómaki na bikuke ya paúni, mobateli esika ayaki na ekuke, alobaki: “Yo nani?”

¹¹⁷ Alobaki: “Ngai nde evangeliste, Daniel Curry, namemá milimo nkóto na nkóto epai na Klisto. Pe nazali. . . nalingi kokota na ntongo oyo. Mobembo ya bomoi na ngai esili na mokili, sikawa nazali na esika moko te ya kokende.”

¹¹⁸ Nde ndenge wana ekokómela yo na ntongo moko, yo mosumuki. Nde ndenge wana ekokómela yo, yo mozóngi sima.

Nde ndenge wana ekokómela bino baoyo bozoyókísá Molimo Mosantu mawa ete ákima mosika na bino, na kozaláká lisusu na bopolo pe na bolingo te. Botikálá kolela lisusu te eleki mibu ebele. Bótikálá lisusu komiyoka nsoni te, mpo nayebe te eleki ntango boni. Bopolo nyonso esílá bino. Ya solo. Kasi ekoya na ekuke na yo moko na ba ntongo oyo. Pe wana Molimo Mosantu ya bopolo ayei kobeta na ekuke, mpo na nini otiki Ye ákota te?

119 Boye ntango Daniel Curry akómaki kuna na—na—na ekuke, bapusanaki, balobi: “Tokotala soki nkombo na yo ezali awa.” Balukaki bipai nyonso, bamonaki nkombo na ye te. Balobaki: “Te, nkombo Daniel Curry ezali awa te.”

120 “Oh,” alobaki, “ntembe te!” Alobaki: “Nazali evangeliste.” Alobaki: “Namemá milimo epai na Klisto.” Alobaki: “Nameká kosala makambo ya malamú.”

121 Mobateli esika alobaki: “Misie, limbisa elobeli na ngai, kasi nkombo ya Daniel Curry ezali awa te.” Alobaki: “Yoka náyebisa yo eloko okoki kosala.” Alobaki: “Awa tozali na makoki ya kotala likambo na yo te.” Alobaki: “Kasi olingi komema likambo na yo epai mosusu? Okoki komema yango na Esambiselo ya Ngwende ya Pembe, soki olingi.” Kasi alobaki: “Awa tokoki koyokela yo mawa te, ata moke te, mpo yo ozali ná biso awa te. Mpo na yo mawa ezali te.” Alobaki: “Olingi kosamba libanza ya mibale?”

Alobaki: “Mesie, eloko nini mosusu nakoki kosala soki te kosamba libanza ya mibale?”

122 Alobaki: “Ee, boye, okoki kokende na Esambiselo ya Ngwende ya Pembe mpo ósamba libanza ya mibale kuna.”

123 Daniel Curry alobaki ete amiyokaki lokola azali komata na mipepe pene na ngonga moko mobimba. Alobaki ete akómaki na esika moko, pole ezalaki kobakisama, kobakisama, kobakisama, kobakisama. Alobaki, mosika koleka azalaki kokende, koleka pole yango pe ezalaki kobakisama. Ebakisamaki mbala mokama, kongenga koleka mbala nkóto na nkóto koleka ndenge mói etikálá kongenga. Pe alobaki ete azalaki kolénga, kolénga. Pe alobaki, ntango akómaki na kati-kati ya Pole yango, ayokaki Mongongo moko koloba: “Ozalaki ya kobonga be na mokili?” Eutaki mbala moko na—na Pole yango.

Alobaki: “Te, nabongaki be te,” akomaki kolénga.

Elobaki: “Ozalaki ntango nyonso sembo epai na moto nyonso?”

124 Alobaki: “Te.” (Alobaki: “Mwa makambo eyelaki ngai na makanisi oyo nazalaki mpenza sembo te na ntina na yango.”) Alobaki: “Te, na—na—nabanzi nazalaki sembo te.”

Elobaki: “Olobá solo na makambo nyonso, na bomoi na yo?”

125 Alobaki: “Te. Nakanisi lisusu makambo mosusu nasílá koloba, oyo ezalaki mwa lokuta te. . . oyo ezalaki mwa lokuta. Na—na—na—nazalaki mpenza—mpenza kati na bosolo te.”

126 Elobaki: “Boye, osilá kozua eloko moko oyo ezalaki ya yo te, eloko soko nini, mbongo, ata eloko soko nini oyo ezalaki ya yo te?”

127 Alobaki ete azalaki kokanisa ete na mokili azalaki moto malamú, kasi akweisamaki. Alobaki: “Te. Te, nasilá kozua biloko oyo ezalaki ya ngai te.”

Alobaki: “Boye, obongaki be te.” Alobaki: “Te, nabongaki be te.”

128 Alobi azalaki kozela ete na ntango moko boye lokito moko éúta na Pole monene wana, epai Ebenga azalaki, éloba: “Okweisami!” Alobaki, se na ntango yango ayokaki Mongongo moko na sima na ye, oyo ezalaki boboto koleka mongongo ya mama nyonso oyo asilá koyoka. Alobi ete abalukaki mpo átala. Pe elongi ya boboto koleka nyonso oyo asilá komona, ya boboto koleka elongi ya mama nyonso, ezalaki liboso na ye. Pe alobi ete Alobaki: “Tata, Daniel Curry azuaki ngámbo na Ngai kuna na mokili. Ezali ya solo, abongaki be te, kasi azuaki ngámbo na Ngai. Azuaki ngámbo na Ngai na mokili, sikawa Ngai nakozua ngámbo na ye na Likolo. Zua masumu na ye nyonso pe tiyá yango likolo na Ngai.”

129 Nani akozua ngámbo na yo na mokolo wana, ndeko, soki oyokisi Ye mawa pe obengani Ye mosika na yo lelo? Nakokoka lisusu koteya te. Tógumba mitó.

130 E Nzambe molingami, molingami Mwana-mpate ya kosókema, komikitisa, pe bopolo, oyo akufaki. Bandeke bazalaki na bazála, pe bagambala bazalaki na mabúlú, kasi Yo ozalaki na esika te, pe, ata bongo, Nkolo na Nkembo mpenza! Ntango Obotamaki, bazalaki na bilamba ya kolatisa Yo te. E Nzambe, bongo bilamba na ngai ekosunga ngai na nini? Mituka na ngai ekosunga ngai na nini? Ndako kitoko ekosunga ngai na nini? Ekosunga na nini na mokolo wana? Ozalaki na baninga te; moto moko te alingaki kozala moninga na Yo. Emonanaki lokola moto moko te azalaki na mposa ya kopesa Yo loboko mpo na lisungi. Olobaki ete na mokolo wana Okoloba: “Nazalaki na nzala, boleisaki Ngai te. Nazalaki bolumbu, bolatisaki Ngai te.” Biloko nyonso oyo tozali na yango ekosunga biso na nini na mokolo wana, Nkolo? Tika ete tózua ngámbo na Yo, mpo soki ntango wana ekoki pe toyei Liboso na Ye, oyo-na-nguya-nyonso, oyo-na-bisika-nyonso, oyo-na- . . . E Nzambe, ntango tokoyoka Ebengá wana, ná mapapú na Yango, afandi kuna na kati ya Pole monene wana, Ekongenga Libela na Libela. Mpo, Ofandaka kati na Pole!

131 “Ntango ekosengela nátelema kuna ngai moko, ndeko na ngai ya mobali akei, mokengeli na ngai akei, mama na ngai akei, papa na ngai akei, mwasi na ngai akei, bana na ngai bakei, E Nzambe, nakosala nini na ntango wana, Nkolo? Nakosala nini na ntango wana? Ekoki pe kosalema liboso ete moi élála na mpokwa ya lelo. Kasi nakosala nini? Nakoki kosala nini? E

Klisto, nakozua ngámbo na Yo sikawa! Nakopona lelo. Nakotika matóngi na ngai nyonso ya bato mosusu. Nakotika nkanda na ngai nyonso. Nakotika kowelana-welana na ngai nyonso. Nakosundola nyonso. Kókólá ngai, Nkolo, zuá nyonso oyo nazali na yango. Zuá ngai kaka, Nkolo. Na—na—nalingi kozua esika na Yo. Nalingi kokókolama. Nalingi ete moyími nyonso, loléndo nyonso, kotiola nyonso, nyonso mpenza élongwa kati na ngai. Na sima, nalingi názua ngámbo na Yo, lokola mwana-mpate oyo akókólami, oyo andimi kotika bisengo nyonso oyo babengaka bisengo ya bomoi, mabína nyonso, baféti nyonso, bilamba nyonso ya mabe, kopakola-pakola, rouge à lèvres, ína ya manzaka, na biloko ya pambalapambala nyonso oyo ezali komonana lokola ya mokili. Yo olobaki: ‘Bósala ata lokola mokili te. Bósangana ata na mokili te. Bóbima kati na bangó!’ E Nzambe! Sungá ngai, Nkolo. Kókólá ngai lelo. Zuá ngai lokola mwana-mpate pe tika ete nákóma bába, náfungola monoko te, náloba eloko moko te na ntina na yango, názala bobele wana pe nákókolama.”

¹³² E Nzambe, oyo bokeseni mpenza yango esalaka! Nakanisi lisusu ntango Okókólaki ngai, Ozuaki mwasi na ngai, bebé na ngai, papa na ngai, pe ndeko na ngai ya mobali. Okókólaki ngai mpenza. Ata bongo, na motema na ngai, nayebaki ete nalingi Yo. Ndenge Opamboli ngai mpenza! Ndenge Ozali malamú mingi! Nyonso oyo nazali, nyonso oyo nakokaki kozala, nyonso oyo nakozala; ezali Yo, Nzambe, ezali Yo. Nayámbólí mabe na ngai, nayámbólí nyonso oyo nasílá kosala to kókanisa. Kókólá ngai kaka, Nkolo, nalingi kozala mwana-mpate na Yo.

¹³³ Kaka wana te, Nkolo, kasi zuá moto nyonso oyo azali awa na ntongo oyo, mpate nyonso, pe baoyo bazali na mposa ya kozala bampate, kókólá bangó nyonso, na ntongo oyo, Nkolo. Kangísá makolo na bangó na mobimbi ya Nsango Malamú. Tiká ete Molimo Mosantu ákamba bangó na kobongola motema sika-sikawa, báyéba ete bazalaki kozanga limemya epai na Nzambe. Pe tiká ete Ákókola bozangi limemya nyonso, mokili nyonso pe biloko nyonso ya mokili. Ókókola yango nyonso na ntongo oyo, Nkolo, mpo tókoka kozala motema píó kimia liboso na Yo, lokola Baklisto oyo babotami mbala ya sika. Salá yango, Nkolo.

¹³⁴ Nalingi Yo. Nalingi kokende, ézala na ntango ya molunge, názala na mposa na yango to te. Nalingi kokende. Nalingi kozua ngámbo na Yo, mpo nalingi ete Ólobela likambo na ngai na mokolo wana, Óloba: “Ee, azuaki ngámbo na Ngai, sikawa Ngai nakozua ngámbo na ye.” E Nzambe, sala yango lelo.

¹³⁵ Pe wana motó nyonso egúmbami, pe motema nyonso egúmbami. Nazali komituna na ntongo oyo soki moto moko azali awa, oyo asosoli ete olukaki kosala makambo na ndenge na yo moko, osalaki makambo oyo osengelaki kosala te, pe omoni na ntongo oyo ete olingi Nkolo ákókola yo, pe olobi: “Ákómisa yo mwana-mpate ya solosolo,” ótóbola loboko. Nzambe ápambola yo, madame. Nzambe ápambola yo, ndeko

mobali. Nzambe ápambola yo, ndeko mobali. Moto mosusu oyo akoloba: “Kókólá ngai, Nkolo, natelemi. Nazali mpate. Nalingi ata kofungola monoko na ngai te, nalingi bobele ete Ólongola mokili nyonso kati na ngai.” Nzambe ápambola yo, ndeko mobali. Nzambe ápambola yo, madame. Nzambe ápambola yo, mwana na ngai ya mobali. Nzambe ápambola yo, madame. Nzambe ápambola yo, ndeko mwasi. “Kókólá ngai, Nkolo.” Ndeko mwasi Gertie. . . [Mobeti pianó—N.D.E.] Pe Nzambe ápambola yo, madame. Nzambe ápambola yo, ndeko mwasi. “Kókólá ngai sikawa, Nkolo. Na—nalingi ete makambo nyonso ya mokili. . . Nalingi kozua ngámbo na Yo na ntongo oyo. Nalingi kozala lokola mpate oyo bakókóli. Nalingi ete makambo nyonso ya mokili élongwa kati na ngai. Nalingi kozala wa Yo pe Yo ózala wa ngai. Okolinga koyamba ngai, Nkolo, wana natómboli loboko epai na Yo?” Nzambe ápambola yo, madame. Nzambe ápambola yo, misie. Nzambe ápambola yo. Nzambe ápambola yo, misie. Nzambe ápambola yo, madame. Nzambe ápambola yo, madame, namoni loboko na yo. Nzambe ápambola yo, ndeko na ngai ya mobali. Nzambe ápambola yo, mama moke. Ezali malamumu. Nzambe ápambola yo kuna na sima, mama. Nzambe ápambola yo, ndeko mwasi. Ezali malamumu. Zalá kaka sembo. “Nalingi mpenza ete Nzambe álongola nyonso kati na ngai, oyo ezali mpenza lokola Ye te, mposa nyonso ya moyími oyo nazali na yango, kozanga limemya nyonso oyo nazali na yango. Nalingi ete Ákókóla ngai mobimba mpenza, na ntongo oyo. Nalingi kozala lokola Ye. Názala na makoki to te, etali ngai te; nazali na makoki ata moko te. Nazali bobele na likoki moko, yango ezali, koya epai na Ye. Ye ázua oyo etikali.”

¹³⁶ Mosumuki moko azali awa oyo atátólá Klisto atá mokolo moko te, oyo abikisámá naino te, pe olingi ete tókanisa yo na libondeli oyo na ntongo oyo, okolinga kotómbola loboko, moninga mosumuki? Nzambe ápambola yo. Mosusu, tómbola loboko, lobá: “Kanisa ngai, Ndeko Branham. Nazali Moklisto te, pe nayebi te na ngonga nini mpenza ekosenga nákutana na Nzambe. Pe na—nalingi ete ókanisa ngai sikawa na libondeli, wana ozali kosukisa.” Ee, okolinga kotómbola loboko mpo nábondela mpo na yo? Azali komona. Nzambe ápambola yo, mama moke. Nzambe ápambola yo, madame. Nzambe ápambola yo, misie. Moto mosusu: “Nalingi názala, nalingi ete. . .”

¹³⁷ Bato boni bazali awa oyo bazóngá sima? “Oh,” okoloba, “nakondima yango te, Ndeko Branham.” Kasi, tala, soki Ebengá wana ya bopolo atíká yo, ndeko, eloko moko ezali kotambola malamumu te. Eloko moko ezali kotambola malamumu te na ntango oyo bókokoka koyikelana mpiko te. Soki okoki kolimbisa moto nyonso uta na nse ya motema na yo te, ata soki asalaki nini to alobaki nini, soki okoki kolimbisa bango uta na bozindo mpenza te, Yesu alobaki: “Soki bolimbisi moto nyonso mabunga na ye

te, na motema mobimba, Tata na bino na Likolo pe akolimbisa bino te.”

¹³⁸ Sikawa, bongo soki, na molunge oyo boye, bongo soki lelo oyo Nzambe abengi yo? Wana Liziba ezali polele, lingomba ebelemi, Molimo Mosantu afandi awa likolo na songe ya etutú ya ndako oyo, Abelemi mpo na kokita noki-noki pe kozonga na motema na yo mpo na kokomisa yo moto na bopolo pe kimia. “Esengeli násala nini, Ndeko Branham?” Kómá bobele mwana-mpate. Molimo Mosantu akokita mbala moko soki okómi mwana-mpate. Kasi soki ozali na bamposa ya mabe, likanisi ya mabe—ya mabe, olingi kosala makambo na ndenge na yo moko, pe olingi te kosundola yango, boye Molimo Mosantu akoyáká soko moke te.

¹³⁹ Sikawa ná mito na biso togúmbi, nayebi te soki moko kati na bino baoyo botómbolaki maboko. . . Sikawa, Yesu alobaki: “Ye oyo akoyoka Maloba na Ngai pe akondimela Ye oyo atindi Ngai, azali na Bomoi ya Seko, akosambisama te kasi alongwé na liwa, akómi na Bomoi,” Yoane 5:24. Kasi sikawa soki bokolinga koya kofukama awa na etumbelo, tóbondela elongo kino ete bopolo pe kimia wana bozaláká na yango, to oyo bokolinga kozala na yango, éya epai na bino lisusu. Ná mito na biso kaka ya kogumbama, wana tozali koyemba: “Liziba moko ezali, oyo etondi na Makila,” nalingi ete bóyá kofukama pe kobondela. Moto nyonso oyo alingi koya sikawa, áfúkama awa liboso na etumbelo pe ábóndela mwa moke.

Liziba moko ezali, oyo etondi na Makila,
Oyo ekamatami na misisa ya Emanuele,
Soki basumuki bamibwaki na nse. . . (Nzambe
ápambola yo, madame, yáká kofukama awa)
Ekolongola. . .

¹⁴⁰ Wana bogúmbi mitó, ndenge pe nakolikya ‘te bogumbi mitema na bino. Boyebi nani ayei moto ya liboso na ntongo oyo, yango esengelaki kosala bino nsoni? Mwasi moko ya moíndo, mobóla mwasi, ná matíndí evímbá, suki pembe, ayei tee awa na etumbelo.

¹⁴¹ Eleki mwa ntango awa, mobangé mobali moko ya moíndo abikisamaki, na ntango ya boúmbu. Lokola autaki kobikisama, akendeki koyebisa patron na ye ete azuaki bonsómí. Alobaki: “Ozui nini?”

Alobaki: “Nazui bonsómí.” Na bongo apesaki ye bonsomi.

¹⁴² Tala bato mosusu bango oyo bazoya kozua lobiko na ntongo oyo. (Alobaki ete azui bonsómí.) Moto nyonso ázobondela, pe kobondela na bozindo nyonso soki olingi, wana Molimo Mosantu azali kotala makambo ya baoyo bazali kozua mikano.

Alobaki: “Mose, olobi ete ozui bonsómí?” Alobaki: “Iyo, misie, patron. Nazui bonsómí.”

143 Alobaki: “Soki ozui bonsómí, boye ngai pe nakopesa yo bonsómí. Kende koteya Nsango-malamu.”

144 Ntango abelemaki pene na kokufa, bandeko na ye mingi ya mindele bayaki kotala ye, bongo ntango bayaki, alobaki, atako azalaki kati na komá. Ntango alamukaki, alobaki: “Nakanisaki ete nasi nakendeki.” (Nzambe ápambola yo, ndeko na ngai ya mobali, fúkámá kaka, na esika wana.) Alobaki: “Nakanisaki ete nasilaki kokende.”

Balobaki: “Omoni nini, Mose?”

145 Alobaki: “Ntango nakotaki na ekuke yango, namonaki Ye.” Alobaki: “Natelemaki wana pe nazalaki kotala Ye.” Pe alobaki: “Mwanje moko ayaki wana pe alobi: ‘Yaka, Mose. Otei Nsango-malamu mibu ebele, róbe pe motóle ezali kozela yo.’” Alobaki: “Bólobela ngai likambo ya róbe ná motóle te. Nazali na mposa ya róbe ná motóle te. Nazali bobele na mposa ya kotala Ye.” Nakanisi ezali mposa ya Moklisto nyonso.

146 Eleki mwa ntango awa, ngambo kuna libanda ya Chicago, nazalaki na colize, na musée moko, nde nalingaki naloba, nazalaki kotala biloko ya ndenge na ndenge oyo ezalaki kuna. Namonaki mobangé Moíndo moko ya, ná mwa suki ya pembe zinga-zinga na motó na ye, azalaki kotambolatambola kuna, ná ekoti na ye na loboko. Natalaki ye. Atalaki na kati ya mwa esika moko, pe azongaki mbangu sima, pe mpisoli ebandaki kokita na mobange ya matáma na ye moíndo. Abandaki kobondela. Nazalaki kotala ye mwa moke. Atalaki yango lisusu, abandi lisusu kolela. Napusanaki wana pe nalobi: “Misie.”

Alobaki: “Iyo, moninga mondele?”

Nalobaki: “Namoni ete ozali...Eloko nini epasoli yo motema boye? Eloko nini esali ete motema na yo épasuka boye?”

147 Alobaki: “Misie, soki osimbi mopanzi na ngai, mopanzi na ngai etondi na bilembo ya mpótá.” Alobaki: “Kala nazaláká moómbo.” Alobaki: “Na kati ya mwa vitrine oyo, elamba moko ezali kuna.”

Nalobaki: “Namoni ete ezali elamba, kasi eloko nini mpenza eza ya kokesana ná yango?”

148 Alobaki: “Litónó wana likoló na yango,” alobaki, “ezali makila ya Abraham Lincoln.” Alobaki: “Makila yango nde elongólá ngai fimbo ya boumbu.” Alobaki: “Sikawa, mondele, elingaki pe kopasola yo motema mwa moke, boye te?”

149 Nayambaki ye na kígó na ye mobange, nalobaki: “Nzambe ápambola yo, ndeko. Nayebi Makila mosusu oyo epasolaka ngai motema.”

Alobaki: “Ngai pe nayebi Makila yango, misie.”

150 Nalobaki: “Ye moto alongólá ngai na fimbo ya boumbu.” Kala nazaláká kobima mokolo ya lomingo, kosala mimekano

ya mbangu pe bisálásala, pe kobeta masolo ya bosoto. Pe, E Nzambe, ndenge nini nasalaki makambo yango? Nazali naino na bilembo ya makambo yango na motema na ngai. Kasi esengo na ngai ezali ete Asilá kolongola ngai na fimbo yango. Yango nyonso wana esilá sikawa, Azuá esika na ngai.

¹⁵¹ Eleki mwa ntango, nazalaki kotala mwasi moko, azalaki na makambo ya nsóni mingi na lolenge ete nalingaki kokwéisa ye. Nzambe apesaki ngai emononeli. Boye nabondelaki mpo na ye, mpo namonaki ete masumu na ngai ezalaki monene kaka se lokola oyo ya ye. Nakendeki kofanda pembeni na ye pe ayokaki nsóni, nayebisaki ye ete nazali motei. Banninga na ye mibale ya mibali. . . Azalaki na mibu soki ntúkú motoba na mitano to ntúkú nsambo, baninga na ye mibale ya mibali bafúkamaki wana, pe bango nyonso bapesaki mitema na bango epai na Klisto. Oh! la la! oyo nde bokeseni mpenza!

¹⁵² Yo okosepela te? Osilá kaka kosala masumu mingi mpenza, na ntongo oyo, motema na yo ekómá moíndo pe na bosoto na lolenge ete ata Molimo Mosantu akoki kosimba yango te? Ntango mosusu Ebengá asilá na Ye kopumboa mpo na Libela, Akendé libela.

¹⁵³ Nzambe ápambola yo, cherí. Mwana mwasi moko ya moke azali koya. Nzambe ápambola yo, molingami. Okoloba: “Mwana mwasi ya moke wana ayebi te.” Oh, iyo, ayebi. Atángá na ye babúku pe masolo ebele ya bolingo lokola bino nyonso te. Yango nde mama na likambo, azali na bopolo. Yesu alobaki: “Bótika bana mike báyá epai na Ngai.”

¹⁵⁴ Moto mosusu akolinga koya kobakisama na ntongo oyo? Etumbelo ezali polele. Sima na mwa ntango, wana tokoyemba lisusu, nde tokobondela wana basumuki oyo babongoli motema bazali kobondela.

Moyibi pene na liwa asepelaki komona
Liziba yango na . . . (Ya solo, elikia nyonso
esilaki, mobali yango akómaki na suka.)
Kuna, ata nazali mabe lokola ye, tika ete . . .

¹⁵⁵ Olingi koya sikawa te? Olingi koya te, yo oyo oyebi malamau koleka? Biblia elobi: “Soki oyebi kosala bolamu, kasi osali yango te, eleki lisumu, mpo na yo.” Olingi koya te? Oyebi ete oza na libunga. Luká nzela ya koya kofúkama awa na etumbelo, pe yebisa Nzambe ete oyoki mabe na ndenge osalaki Ye mabe. Tiká Molimo Mosantu áyá lisusu pe ápesa yo boboto, bopolo pe kimia lisusu. Okolinga te? Kobosana te, soki okufi, pe Ye asilá kotika yo, moto moko te akozala mpo na kolobela likambo na yo. Alingi ete ózua ngámbo na Ye na ntongo oyo. Nzambe ápambola yo, ndeko na ngai mobali.

¹⁵⁶ Tozali kozela. Basilí nde, bobele bato zomi na mitano na kati ya losambo nde bayoki mpenza ete bakweisami? Bobiká bomoi ya kimia, ya boboto, ya bopolo, ya mobulu te? Sikawa,

likambo oyo etindami nde na Molimo Mosantu. Olimbisaka, ozali na bangúná te? Bomoi obiká kala, yango ezali likolo ya mpamela ya basumuki? Obikaka lokola bapakano te, obikaka ndenge mosusu? Bomoi na yo ebongwana na mobimba? Molimo Mosantu ya bopolo oyo afandi na ngwende ya motema na yo, azali kosala ete óbika na kimia, na boboto pe na bolingo, ná bato nyonso? Bazalani na yo ná bato nyonso bayebi, pe baninga na yo nyonso na mosala bayebi, ete ozali Moklisto ya bopolo, ya boboto, ya kosókema pe ya komikitisa? Ebengá ya Nzambe azali elongo na yo? Ya solo mpenza? Oyo ekoki kozala libakú na yo ya suka. Malamu.

¹⁵⁷ Boye mpo na bino baoyo bozali awa na etumbelo, Nzambe ápambola bino. Bozali na ntina ya kosambisama te sikawa. Molimo Mosantu asílí kosambisa bino. Pe boluki kobatela makoki na bino te, koloba: “Oh, nazalá Moklisto bandá kala. Naza na ntina ya kokende te.” Bamosusu kati na bino, ezali mbala ya liboso oyo boyei na etumbelo. “Nakoki kotikala na ngai mosumuki soki nalingi, ezali makoki na ngai.” Iyo, ezali ya solo. Ozali ekelamu moko na bonsomi ya kopona, okoki kosala ndenge olingi. Kasi osundoli makoki na yo na ntongo oyo. Okoloba: “Bato bakoloba nini, ngai nalobaka ete nazali Moklisto ebongo nákende lisusu na etumbelo, bakoloba nini?” Kasi Nzambe azoloba nini? Alobaki ete bóyá, pe bosali yango. Sikawa bosundoli makoki na bino, boyei mpo Molimo Mosantu ya bopolo ázua esika na Ye na mitema na bino lelo. Nayebi ete Akosala yango. Nayebi ete Akosala. Alakaki ete Akosala yango. Tala, Ekoki kozanga te, kokoka kozanga koya te. Azali kobondela, kolela, Akufaki, pe nyonso wana, mpo na kozua esika oyo ya koya, kolinga koya epai na yo.

¹⁵⁸ Pe na bangonga na yo ya liwa, wana mwanje ya liwa akokóma na makolo ya mbeto, na esika ya komona eloko moko ya mabe nsómo, wana oyebi ete oboyaki koya mokolo moko, na bongo elimo na yo ekóma moíndo pe na mbindo, ntango esilá koleka, ata soki oleli ndenge nini. Esau asalaki lisumu pe abwakaki lisumu na ye ya ngolu. . . kútu, abwakaki nde mokolo na ye ya ngolu, pe azuaki libaku malamumu mosusu te. Alelaki mingi mpenza, komeka koluka esika mpo ákoka kosembola likambo yango, kasi akokaki kosala yango te. Nzambe asilaki kobénga ye mpo na mbala ya suka.

¹⁵⁹ Kasi bino bosundoli makoki na bino nyonso pe baninga na bino nyonso, bamposa na bino nyonso pe makambo nyonso, na ntongo oyo, mpo na koya awa. Bosundoli makoki na bino, mpo na kofukama awa pe kosolola na Nzambe. Nazali koloba na bino na nzela na Liloba ya Nkolo, ete Klisto alobaki: “Ye oyo akoya epai na Ngai, Nakobengana ye soki moke te.” Sikawa wana bozali kuna na etumbelo, bóyámbola, bóyébisa Ye ete boyoki mawa ndenge bosalaki makambo oyo bosalaki.

¹⁶⁰ Yango wana nde bato bazuaka Molimo Mosantu te ntango bazuaka libatisi, bayámbolaka na mobimba te. Nzambe azokoluka ápesa yo Molimo Mosantu. Alingi ete ózala na boboto, na bopolo pe na kimia. Yango wana nde ókotélema ná moyími na bino na motema. Oh, okoki kotélema, kogánga, koloba minoko ya sika, to nini, yango ekosala te ete ózua Molimo Mosantu. Osengeli kotélema wana moto ya ndenge mosusu. Osengeli kotélema wana ná bopolo, boboto pe kosókema, komikitisa, pe Molimo ya Nzambe efandi kati na yo. Na mobu elandi, okobwaka miso na sima pe okomona epai okómi, okomona ete ozali ntango nyonso kokende liboso. Oyo wana nde Molimo Mosantu. Molimo Mosantu ezali bolingo, esengo, kimia, boboto, kosókema, bopolo, motema molai, kondima. Sikawa, yámbólá bobele pe yébisá Nzambe ete ozali na mposa na yango sika-sikawa. Azali. . . Akosala yango.

¹⁶¹ Mwana moke ya mwasi, oyo kuna, cherié, yo pe sala ndenge moko. Ópambolama. Mama na yo atele mi wana pe atieli yo maboko.

¹⁶² Molingami ndeko mobangé mwasi ya moíndo oyo awa, oyo agúmbami na etumbelo. Ntango mosusu suka ya bileyi na yo ezalá kaka lipa ya masangu ná potopoto ya masangu, ntango mosusu esalá ete ófanda na esika moko ya pambalapambala, na ndenge oyo nayebi, ndeko mwasi. Nzambe ápambola motema na yo, ndako moko monene ebongisameli yo na Nkembo na ntongo oyo. Ya solo.

¹⁶³ Nabwaki miso na etumbelo pe namoni mama moko, suki na ye ebandi kokóma pembe, elenege mama moko ná motó akitisi na nse, mwasi moko ná ebele ya suki ya pembe. E Nzambe! Namoni mibali bafukami, bamosusu bazali awa. Bóbongola bobele mitema, bóyébisa Ye ete boyoki mawa. Boyebisa Ye ete bokosala yango lisusu te. Na ngolu na Ye, bokotika kozanga boyokani na bino nyonso, bandá lelo. Ete bolingi kozala na bopolo pe na kimia. Ete bolingi kozala na komikitisa pe kokende epai Akokamba bino.

¹⁶⁴ Soki bato balobi likambo moko boye, ata soki emonani lokola likambo ya solo, okosundola makoki na yo ya kotóna mozalani na yo. Okoloba nde, okoloba nde na ntina na Yesu. Okosala bobele makambo oyo ezali sembo. Okobima lokola mobomi bato te. Okobima te mpo na kopumbwela moto oyo ayebi likambo te. Kasi omoni kotalisama ya mpiko ya Baklisto ya solosolo, pe olingi kozala lokola bango. Okozala na ntina ya koyebisa moto moko te ete ozali Moklisto, soki ozali yango, bakomona yango pe bakoyeba yango ntango okobanda koloba. Otiyámá elemba na kati pe na libanda.

¹⁶⁵ Sikawa, lokola okitisi motema, bóngólá motema sikaoyo. Yébisá Nzambe, ete oyoki “mawa,” yo “okosala yango lisusu te,” omiyoki “nsoni,” ndenge osalaki. Na sima nde nakobondela

mpo na yo. Pe nandimi ete, na ngonga wana mpenza, kimia ekofanda mpenza na motema na yo, kimia mpenza lokola ebale ekotiola na elimo na yo. Ntango mosusu okogánga te, ntango mosusu okoloba minoko ya sika te, ntango mosusu okopumbw-pumbwa te; kasi okolongwa na etumbelo ná Eloko moko kati na yo, Eloko moko kati na yo oyo ekobwakela yo lóngo, na mobange na ekulusu makasi na bomoi na yo mobimba. Sikawa bóndela, wana ngai nazali kobondela. Yámbólá.

¹⁶⁶ Tata na biso na Likoló. Lokola bikelamu oyo ebongi te, na ndako móto oyo ékotokisa boye na ntongo oyo, ndako ya motoki oyo; kasi, e Nzambe, Obimisi biso yango lokola motoki. Molimo Mosantu akiti, Andimisi bato ete bazalaki na libunga. Bazalaki kosala masumu. Milimo na bango ezalaki na lolendo. Bakómaki bato na mindondo, kolanda makambo oyo etali bango te, baoyo bayebi nyonso, koboya kobongola mitema, koboya kolimbisa baoyo basalaki bango mabe. Bazalaki koboya, kasi lelo Molimo Mosantu azui Liloba na Nzambe, Atii Yango na mitema na bango ya bopolo, pe Alobi: “Sikawa olingi kozonga epai ozalaki ntango oyaki mbala ya liboso na etumbelo, kozonga epai moto nyonso, epai olingaki moto nyonso, pe olingaki Ngai na bolingo oyo ekufaka te? Boye telema pe yaka na etumbelo.” Basali yango, Nkolo.

¹⁶⁷ Sikawa, nabondeli ete Óbúlisa makanisi na bango, Nkolo, búlísá mitema na bango, pesá bango bopolo pe kimia. Tika ete bátélema longwa na etumbelo oyo sikawa, sima na bango koyámbola, kopesa bomoi na bango epai na Yo, bázonga na bandako na bango. Ata soki likambo nini esalemi, soki mobali na yo atomboki, to mwasi na yo atomboki, to mozalani na yo atomboki, to moto oyo osalaka na ye to moninga ya mosala: “Ngai nakozala kaka na bopolo lokola ebengá.”

¹⁶⁸ Sukasuka, kozongisa mabe etali nde Yo, ezali likambo na Yo: “Ngai nakozongisa mabe, Nkolo alobi bongo.” Tomonaka mpenza ete ezalaka bongo, Nkolo. Fándá kaka kimia, zalá na bopolo, okomona ndenge Nzambe akozua . . . akokita mbala moko epai na mwana-mpate na Ye. Ya solo, ya solo mpenza. Mobateli mpate malamú oyo apesi Bomoi na Ye mpo na bango, Akitaka mbala moko epai na bampate na Ye. Pe Akokamba bango. Mawa na moto oyo ákosala bango mabe! Mawa na moto oyo akoloba liloba moko mpo na kotélemela bango! Alobaki: “Ekozala malamú ete bákanga yo libángá ya monene na kingo, pe bázindisa yo na bozindo ya mbu. Banje na bango batalaka ntango nyonso elongi ya Tata na Ngai oyo azali na Likoló.” Bomoni? E Nzambe, tolingi . . . “Pe oyo bokosala bango, bosali nde na Ngai.”

¹⁶⁹ Boye, Nzambe, nalingi kozala na bopolo. Ngai moko pe namitii na etumbelo, na ntongo oyo; na ntongo oyo te, kasi na ntongo nyonso pe mikolo nyonso. Nalingi kozala na kimia pe na bopolo, lokola Yesu. Salá yango, Tata. Sungá biso mpo tókóma

bongo sikawa, tiká ete bambóngé ya bolingo ezángá suka étiola likoló ya milimo na biso.

Kimia! Kimia! Kimia kitoko,
 Ezali kolongwa na likoló epai na Tata; (Bozali
 koyoka Yango sikawa te na mitema na biso?)
 . . .likolo ya molimo na ngai libela, (Aleluya
 Aleluya!) . . .
 Kimia! Kimia! Kimia kitoko . . .

¹⁷⁰ Ndeko mwasi Gertie alobi náyebisa na losambo mobimba ete ye pe akweisami, kasi azui pianó lokola etumbelo na ye. Lokola etumbelo, pianó nde etumbelo na ye, alobi: “Lobá na losambo ete bábondela mpo na ngai,” wana afandi wana, mpisoli ezali kotanga na manéti na ye. Eteyelo oyo nde etumbelo na ngai. Ngai pe nayámboli, Biblia na ngai epoli. E Nzambe!

Kimia, kimia ya Nzambe!
 Ezali kolongwa na likoló epai na Tata; (Oh,
 aleluya!)
 . . .likoló ya molimo na ngai libela . . .

¹⁷¹ E Nzambe, soki nasalaki lisumu epai na moto, epai na Yo, lóngólá yango, Nkolo. Lóngólá lisumu na mwa losambo na ngai, na ntongo oyo.

¹⁷² Bato boni bayoki ete Nzambe alimbisi bino, ete Ebengá ya Kimia afandi lisusu na mitema na bino? Auti kozonga sikawa, Azongeli esika na Ye. Molimo Mosantu auti kozonga pe Alobi: “Mwana na Ngai, Nazalaki ntango nyonso na mposa ya kolinga yo. Yo nde ozalaki kopesa Ngai nzela ya kosala yango te. Nakokaki kofanda esika moko na molimo na yo ya kala ya moyími te. Kasi sikawa, lokola otiki yango, Nazongi na motema na yo na ntongo oyo.” Boni bamiyoki bongo? Tómbólá loboko. Tómbólá loboko, ezali bongo, na etumbelo mobimba. Oh, ezali malamumu. Boni kuna na eyanganelo bamiyoki bongo? Tómbola loboko. Oh! [Ndeko Branham alobi na mobéti pianó: “Kozala lokola Yesu.”—N.D.E.]

¹⁷³ Tata na biso na Likoló, totondi Yo mpo na ntango kitoko oyo, ya komibulisa, ezali lokola kosimba pôme na loboko, kofina yango, koníka yango, kino ékóma petepete, petepete mpenza na lolenge ete bebé akoki kofanda pe kolia yango. Bongo nde tolingi ete mitema na biso ékóma, Nkolo. Kámátá yango na loboko na Yo oyo ezali na bilembo ya nsété, pe níká yango, lobá: “Mwana na Ngai, omoni te ete ozalaki kopesa Ngai mpasi? Ozalaki kopesa Ngai mpasi ntango ozalaki kosilika. Ozalaki kosala Ngai mpasi, oh, motema na Ngai ezalaki kotangisa makila mpo na yo, mwana, ntango Nazalaki komona yo kosala makambo *boye na boye*. Kasi lokola Nasimbi sikawa motema na yo na loboko na Ngai, Nalingi kokomisa yango boboto mpenza. Nalingi kobongisa yango na lolenge ete Nákoka kosalela yango pe kofanda kati na yango. Nalingi kozonga na etápe na ntongo oyo, Nalingi názonga mpe

náfanda, kosala efandelo na Ngai epai na yo.” Salá yango, Nzambe. Tolingi Yo. Salá yango, mpo na nkembo na Yo. Tosengi yango na Nkombo na Yesu.

Kozala lokola Yesu, ko... (Bolingaka kokúmbamela boye te? Oh, elimo na ngai etondisami.)

Na mokili, na... (Komona Ye kokita kati na—na bakúmbameli ya boye, oyoki bopolo mpenza na motema? Motema na ngai ekómi kobeta noki-noki.)

...mobembo ya bomoi, uta na mokili kino na Nkembo

Nasengi bobele ete názala lokola Ye.

Okolinga kotómbola loboko wana tozali koyemba yango?

Kozala lokola Yesu, ko... .

(Joe, olingi koya kobondela na ntongo oyo, ndeko? Nzambe ápambola yo. Luká esika awa na etumbelo, Ndeko Joe. Nzambe ápambola yo.)

...mobembo ya bomoi kouta na mokili kino na Nkembo

Nasengi bobele ete názala lokola Ye.

¹⁷⁴ Nayebi ete molungé ezali, moninga na ngai. Nayebi ezali bongo. Kasi na—nabanzi bozali komiyoka lokola ngai. Oh, nazali komiyoka lokola nakoki kopumbwa. Ndenge mpenza Azali malamu! Nakokaki kosala nini? Nalingaki kokende wapi? E Nzambe! Nazali kokende wapi? Nazali kokende na esika nini? Eko—ekozala eloko nini? Nakozala wapi sima na mibu mokámá? Bongo soki nazalaki na Ye te? Wapi, ekimelo mosusu ezali wapi?

Mopaya moko autaki na eliélo ya bibwele na Beteleme,

Na mokili nalingi kozala lokola Ye;

Na mobembo ya bomoi kouta na mokili kino na Nkembo

Nasengi bobele ete názala lokola Ye.

Biso nyonso sikawa.

Kozala lokola Yesu... (Nzambe ákumisama! Iyo, Nkolo! Iyo, Nkolo! Lokola mokili te; lokola Yo!)

...kozala lokola Ye;

Na mobembo ya bomoi kouta na mokili kino na Nkembo

Nasengi bobele...?...

¹⁷⁵ Wana bogúmbi mitó, nakosenga bino eloko moko. Moto moko azali awa asepelisi Molimo Mosantu te. Moto moko abengamaki. Nalobi na Nkombo na Nkolo Yesu, lokola mosakoli na Ye. Nakoki

koyoka ndenge motema na Ye ezokisami. Kuna na kati, moto moko atosaki Ye te, asengelaki koya. Olingi na yo koya te sikawa?

Na mobembo ya bomoi kouta... (Iyo, ndeko mwasi, kasi bamosusu batikali...)... Nkembo Nasengi bobele kozala lokola Ye.

Bobele kozala lokola Yesu... (Yango nde mposa na ngai nyonso, boboto pe kosókema, komikitisa, kozala lokola Ye.)

Na mokili na... (Olingi te koya sikawa? Nzambe moto alingi ete óyá, bozali mwa mingi.)

Na mobembo...

¹⁷⁶ Nayebaki ete bokoya. Nzambe ápambola yo. Nzambe ápambola yo. Nzambe ápambola yo. Yango mpenza. Yango mpenza. Natalaki likolo na eyanganelo oyo, pe namonaki elílingí ya moíndo pe ya nsómo oyo namóná naino te. Molimo Mosantu ezali awa sikawa. Ezali likoló na ngai sikawa. “Koyokisa Molimo Mosantu mawa.”

Kozala lokola Yesu...

¹⁷⁷ Asalaki nini? Akendeki epai Tata akambaki. Nzambe ápambola yo, ndeko mobali. Nzambe ápambola yo, ndeko na ngai ya mobali. Malamu, pusaná awa pe fukama.

Na mokili nalingi...

¹⁷⁸ Ekómi sikawa ntango ya koyámbola, kosembola, kobongisa makambo na lolenge ya kala. Bóyá. Nazali se kokoba koyoka ete bamosusu bazali. Nzambe ápambola yo, madame. Nzambe ápambola yo, madame. Nzambe ápambola yo. Nzambe ápambola yo. Nzambe ápambola yo. Malamu. Molimo Mosantu azalaka ntango nyonso na elonga. Bóyá. Malamu, bópusana awa.

...Ye.

Kozala lokola Yesu, kozala lokola, iyo, Yesu, Na mokili na... (Oh la la, Ya solo! Ndenge wana, bótondisa banzela, bóyá awa pe bóbondela.)

Na mobembo ya bomoi kouta na mokili kino na Nkembo, (Yámbola, yebisa Nzambe ete oyoki mawa, bobele yango nde osengeli kosala.)

...názala lokola Ye.

¹⁷⁹ Bokolinga kokoba koya sikawa, boye te? “Ko...” Malamu, bómitika kaka, Bóyá. “Kozala lokola...”

¹⁸⁰ Okosala nini? Nani akozua ngámbo na yo, ntango mosusu na butú ya lelo? Nani akozua ngámbo na yo ntango liwa ekotingama yo na loboko? Ata soki osalaki nini, Molimo Mosantu afandi wana pembeni na yo. Ye nde alingi ete óyá.

Na mobembo ya bomoi longwa na mokili kino na Nkembo

¹⁸¹ Yámbólá kaka, lobá: “E Nzambe, nayoki mawa. Na—nazalaki na mposa ya kosala yango te. Okozua ngámbo na ngai te soki ngai nazui ngámbo na Yo te sikawa. Pe nalingi ete Ózua ngámbo na ngai, pe ngai nazui ngámbo na Yo bandá lelo. Nakobika ndenge Moklisto asengeli kobika. Nakobongola bizaleli na ngai. Nakokóma na bopolo pe na kimia. Nakotika bato bálobaloba na bango, pe nyonso wana. Nakobika bomoi ya boboto pe ya kimia liboso na Yo.” Ata soki eleki ntango boni olobaka ete ozali Moklisto, ata soki osambelaka na lingomba nini, yango elingi koloba eloko moko te. Yaka nde. Nzambe ápambola yo. Yaka awa, mwana na ngai.

¹⁸² Nzambe azali koloba na bino sikawa. Soki bondimi ete nazali mosali na Ye, Molimo Mosantu alobi na ngai na ntongo oyo, Alobi: “Béngá bango, bazali mingi kuna.” Lelo oyo nde mokolo yango, sikawa nde ntango yango. Batikali penepene mitano to motoba kuna na sima, oyo basengelaki mpenza koya sikawa. Kanisa, ndeko mobali, ndeko mwasi, nazali kotala bino, namoni bilílingí yango ya moíndo likolo na bino. Ekozala malamumu ete bóyá.

¹⁸³ Kozala lokola Yesu! Olingi kozala lokola Ye te, bopolo, kimia, boboto, pe komikitisa? Nzambe ápambola yo, elenge mobali. Nzambe ápambola yo, papa oyo amemi bebé. Nzambe ápambola yo, ndeko mwasi. Nzambe ápambola yo, moninga mosumuki. Malamumu. Yaka kino awa, ndeko na ngai ya mwasi, pusana awa, mílukélá esika. Nzambe ápambola yo.

¹⁸⁴ Molingami ndeko mwasi, ozali na makambo mingi ya kozongisela matondi. Okangamaki na mbeto, ozalaki kobunda na liwa, tala yo wana ozali kotambola, kino na etumbelo. Nzambe ápambola motema na yo ya boboto.

¹⁸⁵ Molimo Mosantu azali koloba lisusu sikawa. Kobongola motema, bélélá kaka na Nzambe, bondela kaka na ndenge na yo moko. Yo moto osalaki masumu, sikawa yo moto osengeli kobondela. Yebisa Nzambe ete oyoki mawa na makambo oyo osalaki. Kokipé bato oyo bazali pembeni na yo te. Lobá kaka: “E Nzambe, limbisa ngai, ezalaki mposa na ngai te ete názala ndenge wana. Nalingi kozala na bopolo. Nako—nakowelana pe nakoswana lisusu ná bato ata moke te.”

¹⁸⁶ E Nzambe, oh, ndenge nasepeli na yango mpenza! Tata na Likoló, mpo na moto nyonso oyo azali koyámbola na etumbelo sikawa, agumbi motó, afukami na kobondeláká! E Nzambe, tiká ete bamama, bapapa, bana, batata, bamama, ná bamosusu, bazalani, bandimi ya losambo, basungi, bayángeli misolo, E Nzambe, na ntango oyo ya kopesamela lolenge na lolenge ya kala, wana tofandi kati na ndako ya molungé oyo na ntongo oyo, Molimo Mosantu akiti pe alobeli biso na ntina na kimia. E Nzambe, nalingi kozala wana na mokolo yango mpo náyoka Yo koloba, na bopolo: “Iyo, oyaki pe ozuaki ngámbo na Ngai, sikawa

Ngai nde nakozua ngámbo na yo.” Nalingi ete Ótiya kimia wana na motema moko moko oyo ezali awa lelo, e Nzambe. Na kimia pe na bopolo, nalingi ete Ósala yango. Nalingi ete Ókota kuna na mposa ya makasi na lolenge ete étika bango lisusu te, kobanda lelo. Tika ete mabota ékóma ya sika. Tiká ete bato bákóma bato ya sika. Tika ete makambo nyonso ékóma ya sika lelo, mpo bato oyo bamikitisi. Olobaki: “Soki bato oyo babengami na Nkombo na Ngai bamikitisi, pe babondeli, boye Ngai nakoyoka uta na Likolo.” Pe nayebe ete Oyoki, na ntongo oyo, e Nzambe.

¹⁸⁷ Pe nasengi bolimbisi mpo na baoyo batelemaki te, oyo basengelaki koya. E Nzambe, solólá na bango, pe tika ete bázanga kimia na mokili kino mokolo bakozua mokano yango, Nkolo, ya koya kobongisa bomoi na bango epai na Yo. Salá yango, Nkolo. Pambolá moto nyonso sikawa. Tika ete bolamu na Yo pe mawa na Yo ézala ntango nyonso na elimo nyonso oyo eyámbólí pe egúmbami na kati ya losambo oyo na ntongo oyo.

¹⁸⁸ Tata, e Nzambe, nasali yango kokokana na motindo na Yo. Nabengaki bato oyo; batelemaki. Olobaki: “Ye oyo akotatola Ngai liboso na bato, Ngai pe nakotatola ye liboso na Tata na Ngai pe Banje ya bulee.” Mingi kati na bango bazali Baklisto eleki mibu ebele, kasi batelemi na ntongo oyo mpo na koyámbola masumu na bango, ete basalaki mabe. Bakokaki lisusu kolingama te. Molimo Mosantu atikaki bango. Pe mbala mingi bayokaka lisusu bopolo, boboto, kosókema wana te, oyo basengelaki koyoka. Mingi kati na bango bazali basumuki oyo bayei mpo na mbala ya liboso. Kasi, Tata, bazali na mposa ya komiyoka malamau wana, ya kimia oyo eleki bososoli nyonso. Pesa bango yango lelo, Nkolo Nzambe, pe tiká ete bango nyonso bákóma bato malamau pe bátóndisama na Molimo na Yo, wana bakobima awa lelo, mpo na kokende na bandako na bango, kobika bomoi ya ndenge mosusu pe kokóma bato ya ndenge mosusu. Tosengi yango na Nkombo ya Klisto.

¹⁸⁹ “Esika Ezali Na Liziba.” Malamau, bino baoyo bozali na etumbelo, bótelema, bótálela Nkolo Nzambe, bóbaluka pe bópesa mbote ya loboko na moto nyonso oyo azali zinga-zinga na bino. Oh, tokoyemba, biso nyonso sikawa, wana totelemi mwa moke liboso ete tóbondela mpo na babeli.

Esika, esika, iyo, esika ezali,
Esika ezali na Liziba mpo na yo;
Esika, esika, iyo, esika ezali,
Esika ezali na Liziba mpo na yo. (Biso nyonso!)

. . . esika, iyo, esika ezali,
Esika ezali na Liziba mpo na yo;
Esika, esika, iyo, esika ezali,
Esika ezali na Liziba mpo na yo.


Esika, esika, iyo, esika ezali!
[Maloba mazangi na bande—N.D.E.]

¹⁹⁰ Kondima! Oyebi, mokolo wana, ndeko mobali, ntango mwasi na—na yo abengaki ngai, mpo nábondela mpo na yo? Nakendeki mbala moko na chambre, pe Molimo Mosantu ayebisaki ngai: “Kobanga te.” Amen. Azali mpenza solo, boye te? Kitoko mingi! Ee, nkembo na Nkolo! Nayoki mposa ya kogánga elonga! Malamu.

Pe Makila na Ye ekómisaka pembe koleka . . .
 (Ozali na likambo ya koloba?)
 Yesu abikisaka! . . .? . . .

¹⁹¹ Malamu, Ndeko Neville sikawa. Ndeko Slaughter pe azali na likambo ya koloba.

[Ndeko Slaughter alobi. Maloba mazangi na bande—N.D.E.]

[Ndeko Neville alobi: “Ee! Matondi na Nkolo! Amen! Nkembo na Nzambe! Nakanisi moto nyonso azui eloko moko na ntongo oyo.”] Nkembo! Aleluya! Aleluya! [Ndeko Neville azui maloba, na sima alobi: “Bóbosana liyangani ya mpokwa ya lelo te, tozali na molúlú ya kosukola makáká pe ya elámbo.” Atuni Ndeko Branham: “Oyebi soki okozala awa?”] Ntango mosusu ngai pe nakozala awa na mpokwa. Iyo, na ndenge nayebi, nakozala awa, lobá kaka soki babengi ngai epai moko boye. 

LINGÓMBÁ PE LOLENGE NA YANGO LIN56-0805

(The Church And Its Condition)

MOLONGÓ YA MATEYA NA NTINA NA LINGÓMBÁ

Liteya ya Ndeko William Marrion Branham oyo, eteyamaki na Anglais na mokolo mwa lomingo na ntongo, mokolo mwa 5, sanza ya mwambe na mobu 1956, na Branham Tabernacle na Jeffersonville, Indiana, U.S.A. Ekamatamaki utá na bande pe ekomamaka na mobimba na yango na Anglais. Ndimbola ya Lingála oyo ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org